

କରନ୍ତି ମଣ୍ଡଳୀ ନିମନ୍ତେ ପାଠଲଙ୍କ ଲିଖିତ ଦ୍ଵୀତିୟ ପତ୍ର କରନ୍ତି କୁଲମିତାକି ପାଞ୍ଚୁଲ ରାଚାମାନି ରୀ ଲମ୍ବର ଆକୁ ମୂଲୁ ହାଡ଼ା

କରନ୍ତି କୁଲମିତି ରୀ ଲମ୍ବର ଆକୁ ପାଣ୍ଡୁଞ୍ଜିଆହାମାନି ପାଞ୍ଚୁଲ ତାଣ୍ଡାଟି ଜୀସୁ ଜୀସୁ ଜୀନୀତି ୫୫-୫୬ ବାର୍ଷୀ ତାୟୁ ରାୟୁକି ଆହାମାତେ ୧:୧ □ ମା ତାଣ୍ଡା ମାନି କରନ୍ତି କୁଲମିକି ରାଚାମାନି ଆକୁ ବିତ୍ରାଟି ଇଦି ଆହିମାନେ ପାଞ୍ଚୁଲତି ରୀ ଲମ୍ବର ଆକୁ □ ମୋରାପୁନାରି ନାମିମାନେରି ଇଦାଆଁ ନବେଏ ପାଞ୍ଚୁଲ କରନ୍ତି କୁଲମିତି ଦାକା ହାହାନା ରାଚାମାତେସି ୨:୩-୪ ପଦୁତା ଏଞ୍ଜସି ଝେସିମାନେସି □

ପାଞ୍ଚୁଲ ମାକିଦନିୟାତା ମାନି ବେଲ୍ଲାତା କରନ୍ତିତି ରୀ ଲମ୍ବର ଆକୁ ରାଚାମାନେସି ୨:୧୩ □ କରନ୍ତିତା ମାନି କୁଲମିତି କାତା ତିତସ ତାଣ୍ଡାଟି ନେହଁ କାରୁ ବେଟାଆହାନା ରାହଁ ଆହିମାନେସି □ ଇ ଆକୁତା ପୁଃନି ମୋରା ଅଣ୍ପୁଟି ଦାନା ହାନି କାତା ଜାପିନାୟି □ ଇ ଆକୁତା ଜିରୁସାଲମତା ମାନି ଜୀସୁଇଁ ନାମାମାନି ଲକୁଇଁ ସାୟେମି କିହାଲି ଟାକାୟାଁ କୃତିକିହାଲି ଝେସିମାନେସି ୮-୯ □ ଅଡ଼େ ଜିକେଏ କୁଲମି ପାଞ୍ଜାଟି କଚେକା ମିତି ପାଣ୍ଡୁଞ୍ଜି ଆହାମାନାରି ଜାହାରାଇଁ କାଜାରି କିହାକତାଲି ପାଞ୍ଚୁଲ କପାଟି କୁଲମିତି ଏଚରଜାଣା କାଜାରାଇଁ ନିନ୍ଦା କାତା ଝେସିମାନେରି □ ଏଞ୍ଜାରି ପାଞ୍ଚୁଲତି ଅଦିକାରାତି ଆନାମାନା ଆହିମାନେରି □ ଏମିନିଗାଟାଣି ରୀ ଲମ୍ବର କରନ୍ତି ଆକୁତି ରାନ୍ତିଞ୍ଜାକି ଏଞ୍ଜାସି ର ଜୀସୁତି ଅଦିକାରା ତଲେ ପାଣ୍ଡୁଞ୍ଜି ଆଡ଼ାସି ଇଞ୍ଜଁ ଜାଣ୍ଡେତଲେ ଝେସିମାନେସି □

ପତିତା ମାନାୟି

୧ ପାଞ୍ଚୁଲ ଜହରା କିହାନା ଆକୁ ରାଚିନାୟି □ ୧:୧-୭

- ୨ ପାଞ୍ଚଲ ତାନି ହାନି ଜିରୁତି ବାଦଲି କିନାୟି ଇଞ୍ଜା ଏଞ୍ଜାରି ତାଣାଟି
 ବେଟାଆହାମାନି କାତାତାକି ଖେଣ୍ଡେ ଖେହ୍ନାୟି □ ୧:୮-୭:୧୭
- ୩ ଜିରୁସାଲମତି ନାମୁଗାଟି ତାୟିୟାକି ଦାନା କୁଡ଼ିକିହାଲି
 ଖେହ୍ନାୟି □ ୮:୧-୯:୧୫
- ୪ ପାଞ୍ଚଲ ତାନି ପାଣ୍ଡୁଆହାମାନି ପାଣାଟି ଜାଣ୍ଡେ ଖେହ୍ନାୟି □
 ୧୦:୧-୧୩:୧୦
- ୫ ଆକୁତି ରାପ୍ନି କାତା □ ୧୩:୧୧-୧୪

୧ ପାଞ୍ଚଲ ମାହାପୁରୁତି ଅଣ୍ଡୁ ତଲେ କ୍ରୀସ୍ତ ଜୀସୁ ତାଣାଟି ପାଣ୍ଡୁ
 ଆହାମାନାତେଏଁ ଇଞ୍ଜା ମା ତାୟି ତିମତି କରକ୍ତି ଗାଡ଼ାତା ମାନି
 ମାହାପୁରୁତି କୁଲମି ଅଡ଼େ ଆକାୟା ଦେସାତା ମାନି ବାରେ ମାହାପୁରୁ
 ଲକୁତାକି ଆକୁ ରାଡ଼ିମାନମି □

୨ ମା ଆବା ମାହାପୁରୁ ଅଡ଼େ ପ୍ରୁ ଜୀସୁ କ୍ରୀସ୍ତ ତାଣାଟି
 କାର୍ମାମେହ୍ନାୟି ଇଞ୍ଜା ହିଡ଼ି ମିଙ୍ଗେତାକି ଆୟାପେ □

ପାଞ୍ଚଲ ମାହାପୁରୁଇଁ ଜହରା କିନାୟି

୩ ମା ପ୍ରୁ ଜୀସୁ କ୍ରୀସ୍ତ ଆବା ମାହାପୁରୁକି ଜହରା, ଏଞ୍ଜାସି
 କାର୍ମାମେହ୍ନି ଆବା ଅଡ଼େ ଦୁକୁ ଡ଼କୁନି ମାହାପୁରୁ □

୪ ମାହାପୁରୁ ତାଣାଟି ଆମିନି ଦୁକୁ ତୁକ୍ନି ତାଣା ମାରୁ ଦୁକୁ
 ତୁପ୍କି ଆହିମାନାୟି, ଏ ଦୁକୁ ତୁକ୍ନାଣି ତଲେ ଏନିକିହିଁ ବାରେ
 ଲେହେଁତି ଦୁକୁ ବେଟାଆହାମାନି ଲକୁଣି ଦୁକୁ ତୁକ୍ହାଲି ଆଡ଼ିନାୟି,
 ଇଦାଆଁତାକି ଏଞ୍ଜାସି ବାରେ ଦୁକୁତା ମାଙ୍ଗେ ଦୁକୁ ତୁକ୍ନାଣି
 ହୀହାମାଞ୍ଜାନେସି

୫ ଇତିହିଁ କ୍ରୀସ୍ତ ତାକି ମାରୁ ଏନିକିହିଁ ହାରେକା ଦୁକୁ କସ୍ତ
 ହାରେକା ବେଟାଆନାୟି, ଏଲେକିହିଁ ଏ କ୍ରୀସ୍ତ ତାଣାଟି ମାହାପୁରୁତି
 ଦୁକୁ ତୁକ୍ନାୟି ହାରେକା □

୬ ସାମା ମାମ୍ମୁଦୁକୁ କସ୍ତ ବେଟାଆଡ଼ିସାରେ ଏଦି ମୀ ତାକି ଦୁକୁ
 ତୁକ୍ନାୟି, ଅଡ଼େ ଗେଲପି ଆହାଲିତାକି; ଇଞ୍ଜା ମାମ୍ମୁଦୁକୁ ତୁପ୍କି
 ଆଡ଼ିହିଁ, ଏଦି ମୀ ଦୁକୁ ତୁକ୍ହାଲି ତାକି; ମାମ୍ମୁଦୁକୁଲେହେଁତି ଦୁକୁ
 କସ୍ତ ବେଟାଆନମି ମୀରୁ ଏନିକିହିଁ ସାସା ଅଡ଼େ କସ୍ତତଲେ ଦୁକୁ

ବେଟାଆହି ମାଞ୍ଜେରି ମାମ୍ମୁ ଜିକେଏ ଏଲେକିହି ଏ ଦୁକୁ ତୁକ୍ନି କାମା କିହିମାନମି □

୭ ଅଡେ ମୀ ତାଣା ମା ବାର୍ସୁ ହାରେକା ମାନେ □ ମୀରୁ ମା ଦୁକୁ କସ୍ତ ପାଣ୍ଡିନିତାଣା ଏନିକ୍ ଆଣ୍ଡାମାଞ୍ଜେରି, ଏଲେକିହି ଏ ମାମ୍ମୁ ଦୁକୁ ତୁକ୍ନି ତାଣା ଆଣ୍ଡିଦେରି, ଇଞ୍ଜି ମାମ୍ମୁ ପୁଞ୍ଜାମାନମି □

୮ ☆ ଇଚିହି ଏ ତାୟିୟା ଅଡେ ତାଙ୍ଗିସ୍ତାତେରି, ଆସିୟା ରାଜିତା ମାଙ୍ଗେତାକି ଆହାମାନି ସାସ୍ତି ମୀରୁ ପୁନାଆନା ମାଞ୍ଜୁ ଇଞ୍ଜିହି ମାମ୍ମୁ ଅଣ୍ଡି ହିଲଅମି; ମାମ୍ମୁ ମା ବାଡ଼ୟୁଟି ବେଟାଆହାମାନି ସାସ୍ତି ସହଞ୍ଜି ଆହାଲି ଆଡାଆରେଟୁ ଆହାମାଚମି, ଇଞ୍ଜା ମାମ୍ମୁ ନୀତାମାଞ୍ଜାଲି ଜିକେଏ ଆସା ପିସାମାଚମି;

୯ ହାଅ, ମାଙ୍ଗେ ପାୟାଲି ହୁକୁମି ହାପ୍‌କି ଆହାମାନେ ଇଞ୍ଜି ଅଣ୍ଡିମାଚମି, ଏନିକ୍ ମାମ୍ମୁ ମା ମୁହେଁ ବାର୍ସୁ କିହାକତାଆନା ଏମିନି ମାହାପୁରୁ ହାକିଟି ନିକନେସି ଏଞ୍ଜାଣି ତାଣା ବାର୍ସୁ କିନମି;

୧୦ ଏଞ୍ଜାସି ଆଜିହଡ଼େତି ହାକିଟି ମାଙ୍ଗେ ଗେଲ୍‌ପାତେସି ଅଡେ ଗେଲ୍‌ପାନେସି, ଅଡେ ତାୟୁ ଜିକେଏ ଗେଲ୍‌ପାନେସି ଇଞ୍ଜି ତାନିତାଣା ମା ଆସା ମାନେ;

୧୧ ମୀରୁ ଜିକେଏ ମା ତାକି ପ୍ରାତାନା କିହାଁ ମାଙ୍ଗେ ସାୟେମି କିହାମାଞ୍ଜାଦେରି, ଏନିକ୍ ମାଙ୍ଗେ ଏମିନି କାର୍ମାତି ଦାନା ହାପ୍‌କି ଆହାମାଞ୍ଜାନେ, ଏଦାଆଁତାକି ହାରେକା ଲକୁତି ଗୁତିଟି ମା ତାକି ହାରେକା ଜହରା କିଞ୍ଜିଆହିମାନେ □

ପାଞ୍ଜୁଲ ତାନି ଅଣ୍ଡପୁ ବାଦ୍‌ଲି କିନାୟି

୧୨ ବାରେକିହାଁ ଦାର୍‌ତିତା ମୀ ତାକି ମାମ୍ମୁ ମାଣ୍ଡସିତି ବୁଦିତଲେ ତାକାଆନା ମାହାପୁରୁତି କାର୍ମାତି ତାନି ସୁଦୁ ଅଡେ ନାମୁତଲେ ତାକିମାଚମି ଇଞ୍ଜି ମା ଅଣ୍ଡପୁ ସାକି ହାହିମାଞ୍ଜାନେ, ଇଦି ମା ବଡ଼ପଣତି କାତା □

୧୩ ଞ୍ଜାରଲ ମୀରୁ ଏନାଆଁ ପଡ଼ଞ୍ଜି ଆହାନା ତେଲ୍‌ହିଦେରି, ଏ ବାରେ ପିସ୍‌ପେ ମାମ୍ମୁ ମୁଞ୍ଜେ ଅଡେ ଏନାଆଁ ରାଡ଼ିମାଞ୍ଜଅମି,

☆ ୧:୮ ୧:୮ ୧କର ୧୫:୩୨

୧୪ ଅଡ଼େ ମା ପ୍ରଭୁ ଜୀସୁ କ୍ରୀସ୍ତତି ଦିନାତା ମାମ୍ମୁ ମୀ ତାକି ବଡ଼ପଣ ତସାଲି ଆଡ଼ିନମି, ଅଡ଼େ ମୀରୁ ଜିକେଏ ମା ତାକି ବଡ଼ପଣ ତସାଲି ଆଡ଼ିଦେରି, ମୀରୁ ନୀଏଁ ଇଚେକା ପୁଞ୍ଜାନା ବାରେ ପୁନାଆତି ଜିକେଏ ର ଦିନା ମୀରୁ ବାରେ ତାୟୁ ପାତେକା ପୁଞ୍ଜେରି ଇଞ୍ଜି ନା ଆସା ।

୧୫ ଇ କାତା ନେହଁ କି ପୁଞ୍ଜାମାନାକି ମୂଲୁଏ ମୀ ତାଣା ଖାହାଲି ତାକି ନାଞ୍ଜେ ଅଣ୍ପୁ ମାଚେ, ଆତିହଁ ମୀରୁ ରୀ ଦେବା ରାହଁ ବେଟାଆଡ଼େରିମା ।

୧୬ ☆ମୀ ତାଣାଟି ମାକିଦନିୟାତା ହାଜାନା ଅଡ଼େ ଖେଣ୍ଡେ ମାକିଦନିୟାଟି ମୀ ତାଣା ଖାହାନା ମୀ ସାୟେମି ତଲେ ଜୀହୁଦା ଦେସାତା ହାଜାଲି ଆଡ଼ିଇଁ, ଏଦାଆଁତାକି ଏ ନାମୁଟି ତଲିଏ ମୀ ତାଣା ହାଜାଲି ମନ କିହାମାଚେଏଁ ।

୧୭ ଆତିହଁ ଇଲେତି ଅଣ୍ପୁ ଅଣ୍ପିନାୟି ନାନୁ ଏନାଆଁ ଆନାମାନା ଆହାନା କିହାମାଚେଏଁ ? ଇଞ୍ଜା ନାନୁ ଏନାଆଁ ତୀରିକିହା ଡ଼ୟିଇଁ, ଏଦି ଏନାଆଁ ଏଦାଆଁ ଦାରତିତି ଅଣ୍ପୁ ତଲେ କିହିମାଇଁ, ଇଞ୍ଜା ନା କାତା “ହାଅ କି ଆଏ” ଇ ରୀ କାତା ରଣ୍ଡିଏ ଦେବା ହପ୍ଇ କି ?

୧୮ ମାହାପୁରୁ ଟିକାଣାତାସି, ଏଦାଆଁତାକି ନା କାତା ମିଞ୍ଜେତାକି “ହାଅ କି ଆଏ” ଇନି ରୀ କାତା ଆଏ ।

୧୯ ☆ଇତିହଁ କ୍ରୀସ୍ତ ଜୀସୁ ମାହାପୁରୁ ମୀର୍ଏସି, ଆମ୍ବାଆସି ମା ତାଣାଟି ଇତିହଁ ସିଲା, ତିମତି ଅଡ଼େ ନାନୁ ମୀ ତାଣା ଖେକହା ମାଚମି, ଏଞ୍ଜାସି “ହାଅ” ଅଡ଼େ “ଆଏ” ଇନାସି ଆହାହିଲଅସି, ଇତିହଁ ଏଞ୍ଜାଣି ତାଣା ହାଅ ଆହାମାନେ ।

୨୦ ଏନାଆଁତାକି ଇତିହଁ ମାହାପୁରୁତି ବାରେ ଆଞ୍ଜାମାନାୟି ଏଞ୍ଜାଣି ତାଣା “ହାଅ” ମାନେ; ଇଦାଆଁତାକି ଜୀସୁ କ୍ରୀସ୍ତ ତାଣାଟି ମାହାପୁରୁଇଁ ଗାଞ୍ଜୁରମି କିହାଲି ମାର “ଆମେନ୍, ଏଲେଆହଁ ଆପେ” ଇନାୟି ।

୨୧ ତାନୁଏ ମାଞ୍ଜେ ଅଡ଼େ ମିଞ୍ଜେ କ୍ରୀସ୍ତ ତାଣା ତୀରି କିହାମାଞ୍ଜାନେସି, ଇଞ୍ଜା ମାଞ୍ଜେ ବର ହୀହାମାଞ୍ଜାନେସି, ଏଞ୍ଜାସି ମାହାପୁରୁ;

୨୨ ଏଞ୍ଜାସି ତାନି ବୁଟୁ ମୁଦ୍ରା ମାଙ୍ଗେ ଝେଟା ମାଞ୍ଜାନେସି, ଇଞ୍ଜା ଏଞ୍ଜାସି ମା ହିୟାଁ ବିତ୍ରା ସୁଦୁଜୀଞ୍ଜୁ ସିନାଲେହେଁ ହୀହାମାଞ୍ଜାନେସି □

୨୩ ସାମା ନାନୁ ମାହାପୂରୁଇଁ ସାକି କିହାନା ନା ଜୀଞ୍ଜୁତି ମାନ୍ତି କିହିମାଇଁ, ନାନୁ ମିଙ୍ଗେ କାର୍ମା ଆହାନା କରକ୍ତିତା ଝେଣ୍ଡେ ହାଜାହିଲଅଁ □

୨୪ ମୀ ନାମୁତି ମୁହେଁ ମା ଅଦିକାରା ମାନେ, ଏଲେକ୍ ଆଏ, ସାମା ମୀ ରାହାଁତାକି ମୀ ସାଝେମି କିନାତମି ଆହାମାନମି, ଏଦାଆଁତାକି ନାମୁତା ତୀରିଆହାନା ମାଞ୍ଜୁ □

୨

୧ ନାନୁ ମୀ ତାଣା ହାନାୟି ମିଙ୍ଗେତାକି ଅଡେ ଝେଣ୍ଡେ କସ୍ତୁ ଆୟେଏ, ଇଦାଆଁ ମନତା ତୀରି କିତେଏଁ □

୨ ନାନୁ ମିଙ୍ଗେ ଦୁକୁ ହିୟାଇଁ, ଆତିହଁ ନାନୁ ଆମ୍ବାଆରାଇଁ ଦୁକୁ ହୀଇଁ, ଏଞ୍ଜାଣି ପିସପେ ନାଙ୍ଗେ ଆମ୍ବାଆସି ରାହାଁ ହିୟାନେସି ?

୩ ଇଞ୍ଜା ନାନୁ ଆମ୍ବାଆରି ତାଣାଟି ରାହାଁ ପାଣ୍ଡନାୟି ମାନେ, ଏଞ୍ଜାରିତାଣା ନାନୁ ଝାହାନା ଏନ୍ତିକଁ ଦୁକୁ ବେଟାଆଅଁ, ଏଦାଆଁତାକି ନାନୁ ଇ କାତା ରାଚାମାଚେଏଁ, ଏଦାଆଁତାକି ଇଚିହଁ ନା ରାହାଁତା ମୀ ରାହାଁ ଆନେ, ଏଦି ମୀ ବାରେତାକି ନା ଅଣ୍ପୁ □

୪ ଇଚିହଁ ହାରେକା କସ୍ତୁ ଅଡେ ହିୟାଁ କାଡାତାକି ହାରେକା ଦୁକୁତଲେ କାଣ୍ଡୁ ଉକ୍ତହିହଁ ମିଙ୍ଗେ ରାଚାମାଞ୍ଜାତେଏଁ; ଏନ୍ତିକଁ ମୀରୁ ଦୁକୁ ଆଝେରି, ଏଲେକ୍ ଆଏ, ସାମା ମିଙ୍ଗେତାକି ନା ଜୀଞ୍ଜୁନନାୟି ହାରେକା ମାନେ, ଇ କାତା ମୀରୁ ଏନ୍ତିକଁ ପୁଞ୍ଜେରି □

ମାଣସିତି ଦହ ମ୍ବେକ୍ନାୟି

୫ ସାମା ଆମ୍ବାଆସି ଦୁକୁ ହୀହାମାନେସି, ଏଞ୍ଜାସି ନାଙ୍ଗେ ଦୁକୁ ହୀହାମାଞ୍ଜାଅସି, ସାମା ବାରେତେରି ମିଙ୍ଗେ ଦୁକୁ ହୀହାମାଞ୍ଜାନେସି ନାନୁ ହାରେକା ଗାଡିକିହଁ ଝେହ୍ଅଁ □

୬ ମୀ ବିତ୍ରାଟି ହାରେକା ଲକୁ ତାଣାଟି ଏଞ୍ଜାସି ଏନ୍ତି ତଣ୍ଡ ବେଟା ଆହାମାନେସି ଏଞ୍ଜାଣାକି ଏଚେକେଏ ସାରି □

୭ ଏଦାଣିତାକି ଏଲେତି ଲକୁ ଏଚେତା ହାରେକା ଦୁକୁତା ମେଦା ହାନେସି, ଏଦାଆଁତାକି ମୀରୁ ନୀଏଁ ଏଞ୍ଜାଣାଇଁ ପାପୁ ମ୍ବେକ୍‌ହାନା ବାସ୍ତୁ ହୀଦୁ □

୮ ଇଚିହିଁ ଏଞ୍ଜାଣାଇଁ ଜୀଞ୍ଜୁ ନନାଣି ତହ୍‌ଦୁ ଇଞ୍ଜିଁ ବାତିମାଲିମାଞ୍ଜାଇଁ □

୯ ଇଚିହିଁ ମୀରୁ ବାରେ କାତାତି ମାନୁଞ୍ଜି ଆହିମାଞ୍ଜେରି, ଇଞ୍ଜିଁ ମିଙ୍ଗେତାକି ଏମ୍ବାତି ପାରୁମାଣା ଏନିକିଁ ନାନୁ ବେଟାଆଇଁ, ଇ ବାରେତାକି ରାଟାମାଚେଏଁ □

୧୦ ଇଞ୍ଜା ମୀରୁ ଆମ୍ବାଆରି ଦହ ପିହ୍‌ଦେରି, ନାନୁ ଜିକେଏ ଏଞ୍ଜାଣି ଦହ ପିହ୍‌ଇଁ; ଇଚିହିଁ ନାନୁ ଏନାଆଁ ଦହ ପିସାମାଇଁ, ଇଞ୍ଜା ଏମିନି ଦହ ପିସାମାଇଁ, ଏଦାଆଁ କ୍ରୀସ୍ତୁତି ନକିତା ମୀ ତାକି ପିସାମାଇଁ □

୧୧ ଏନିକିଁ ସୟତାନ ମାଙ୍ଗେ ଲାଗେଏ କିହାଲି ପାରୁ ବେଟାଆଏ, ଇଚିହିଁ ମାର ବାରେ ତାନି ଅଶ୍‌ପୁତି ପୁଞ୍ଜାମାନାୟି □

ତ୍ରୟାତା ପାଞ୍ଜୁଲ ମନତା କସ୍ତ ପାଶ୍‌ନାୟି

୧୨ *ଅଡେ କ୍ରୀସ୍ତୁତି ନେହିଁ କାବୁ ଝେକ୍‌ହାଲି ତାକି ନାନୁ ତ୍ରୟାତା ଝାଡି ତାୟୁ ପ୍ରବୁତି କାମା କିହାଲି ଦାରା ଦେପି ଆହାମାଟି ଜିକେଏ,

୧୩ ନାନୁ ନା ତାୟି ତିତସଇଁ ଏମ୍ବାଆଁ ମେହ୍‌ଆଲିଏ ନା ଜୀଞ୍ଜୁ ହିଡୁଡି ଆଆତାକି ଏଞ୍ଜାରି ତାଣାଟି ହେଲ ବେଟାଆହାନା ମାକିଦନିୟାତା ହାଚେଏଁ □

କ୍ରୀସ୍ତୁ ତାଣାଟି ଜୀଣା ଆନାୟି

୧୪ ସାମା ମାହାପୁରୁଇଁ ଜହରା ଆପେ, ଏଞ୍ଜାସି ବାରେବେଲା ମାଙ୍ଗେ ଅହାନା କ୍ରୀସ୍ତୁ ତାଣା ଜୀଣାଆଡି ଲେହେଁ ହାଜାମାନେସି, ଇଞ୍ଜା ବାରେ ଟାୟୁତା ତାନି ବୁଦି ଲେହେଁତି ଗାନ୍ଦା ମା ତାଣାଟି ଝେକ୍‌ହିମାନେସି □

୧୫ ଇଚିହିଁ ଗେଲପି ଆହିମାନି ଲକୁତାଣା ଇଞ୍ଜା ନାସା ଆହିମାନି ଲକୁତାଣା ମାର ମାହାପୁରୁ ନକିତା କ୍ରୀସ୍ତୁତି ହାରେକା ନେହିଁ ଗାନ୍ଦା ଲେହେଁ ଆହାମାନାୟି □

୧୭ ରକ୍ଷାକି ଲକ୍ଷ୍ମୀତାକି ହାକି ହୀନାୟି ଅଡ଼େ ରକ୍ଷାକି ଲକ୍ଷ୍ମୀତାକି ଜୀବୁହାନି ଲେହେତ ନେହଁ ଗାନ୍ଧା ଲେହେତ୍ ଠି ସାମା ଇ ବାରେ କାମା କିହାଲି ଆମ୍ବାଆସି ଆଡ଼ିନେସି ?

୧୭ ହାରେକା ଲକ୍ଷ୍ମୀ ବାଡ଼କାଲି ତାକି ମାହାପୁରୁତି କାରୁ ଝେକ୍‌ହି ମାନେରି, ମାମ୍ବୁ ଏଞ୍ଜାରିଲେହେତ୍ କିହିଲିଅମି, ସାମା ତୀରପୁତଲେ ମାହାପୁରୁତି ହୁକୁମି ତଲେ ତାନି ନକିତା ମାମ୍ବୁ କ୍ରୀସ୍ତ ତାଣା ମାଞ୍ଜାନା କାତା ଜଲିମାନମି ଠି

୩

ପୁଃନି ମେରାତି ହଲିୟା

୧ ମାର କି ଜାହାରାଜ୍ ବଡ଼ପଣ କିହାଲି ମାଟ୍‌ହା ମାନାୟି ? ଆମ୍ବା ଆମ୍ବାଆରି ଲେହେତ୍ ଏନାଆଁ ମୀ ତାଣା ଆଆଡ଼ି ମୀ ତାଣାଟି ମା ତସ୍‌ପି ଆନାୟି ଲଡ଼ାମାନେ ?

୨ ମୀରୁତ ମା ହିୟାତା ରାସ୍‌କି ଆହାମାନାତେରି ଇଞ୍ଜା ବାରେକାଣା ପୁଞ୍ଜାମାନାୟି ଅଡ଼େ ପଡ଼ି ଆହାମାନି ମା ଆକୁ ଲେହେତ୍;

୩ ଅଡ଼େ, ମୀରୁ ମା ସେବା କାମାତା ରାସ୍‌କି ଆହାମାନି କ୍ରୀସ୍ତି ଆକୁ ଲେହେତ୍, ଇଦି ତଞ୍ଜା ଆହିମାନେ; ଏଦି ସୀରା ତଲେ ରାସ୍‌କି ଆହାହିଲେଏ, ସାମା ଜୀବୁତି ମାହାପୁରୁତି ସୁଦୁଜୀବୁ ତଲେ ରାସ୍‌କି ଆହାମାନେ, ଖାଲି ପାଟାତା ଆଏ, ସାମା ଭୟୁଗାଟି ହିୟା ପାଟାତା ଠି

୪ କ୍ରୀସ୍ତ ତାଣାଟି, ମାହାପୁରୁ ନକିତା ବାସ୍‌ ଇଟାନା ମାଦି ଇଲେତି ଆଟ୍‌ଞ୍ଜା ନାମୁ ମାନେ ଠି

୫ ମାର ମା ତାଣାଟି ଏନାଆଁ କିହାଲି ଆଡ଼ାଆୟି, ଏଲେକ୍‌ ଆଏ, ସାମା ମାହାପୁରୁ ତାଣାଟି ଆଡ଼ିନି ବାଡ଼ୁ ମାନେ;

୬ ଏଞ୍ଜାସି ମାଞ୍ଜେ ରାସ୍‌କି ଆହାମାନି ମେରାତି ସେବା କିନାରି କିହାମାଞ୍ଜାଅସି, ସାମା ନେହଁ ଜୀବୁତି ଇତିହଁ ପୁଃନି ମେରାତି ସେବା କାମା କିହାଲି ବାଡ଼ୁ ହାହାମାଞ୍ଜାନେସି; ଇତିହଁ ରାସ୍‌କି ଆହାମାନି ରାଜିମାନା ହାଞ୍ଜିକିନେ ସାମା ନେହଁ ଜୀବୁ ନୀତିକିନାୟି ଠି

୭ ଅଡ଼େ ତୀସ୍‌ତି ଖାଲି ପାଟାତା ରାସ୍‌କି ଆହାମାନି ହାଞ୍ଜି କିନି ମସା ମେରାତି ସେବା କାମା ଇଲେତି ଗାଞ୍ଜୁରମି ତଞ୍ଜାଆହାମାତେ,

ଇଚିହଁ ଇସ୍ରାୟେଲ ଲକ୍ଷ୍ମୀ ମସା ମୁମ୍ବୁଡ଼ି ନାସା ଆନି ଉଜେଡ଼ି ତାକି ଏଞ୍ଜାଣି ମୁମ୍ବୁ ମେସାଲି ଆଡ଼ାଆଡେରି,

୮ ଆଚିହଁ ନେହଁ ଜୀଞ୍ଜୁତି ସେବା କାମା ଏଚେକା ଗାଡ଼ି ଗାଞ୍ଜୁରମି ଆଏକି ?

୯ ତଣ୍ଡୁ ଆଞ୍ଜିକିନି ସେବା କାମା ଗାଞ୍ଜୁରମି ଗାଟାୟି, ଆଡ଼଼ ଦାମୁତି ସେବା କାମା ଏଦାଆଁ କିହଁ ଆଗାଡ଼ା ଗାଞ୍ଜୁରମି ଗାଟାୟି ଆନେ □

୧୦ ଇଚିହଁ ଆନିନି ଗାଟାୟି ଗାଞ୍ଜୁରମି ଗାଟାୟି ମାଚେ, ଏଡ଼ି ଏଦାନି କିହଁ ଆଗାଡ଼ା ଗାଞ୍ଜୁରମି ଆନି କିହଁ ଗାଞ୍ଜୁରମି ହିଲିଆଗାଟାୟି ଆଡେ □

୧୧ ଗାଡ଼େକା ତାକି ନାସା ଆନାୟି ଗାଞ୍ଜୁରମି ବେଟାଆହଁ, କାଲ୍ଲାକାଲ୍ଲା ତାକି ମାନାୟି ଏଚେକା ଆଗାଡ଼ା ଗାଞ୍ଜୁରମି ତଞ୍ଜାଆନେ □

୧୨ ଇଚିହଁ ମାଜେ ଏଲେତି ବାସ୍ତୁ ମାନାକି ହାରେକା ସାସା ଆହାମାନମି □

୧୩ ଅଡ଼େ ଇସ୍ରାୟେଲ ଲକ୍ଷ୍ମୀ ଏନିକଁ ଗାଡ଼େକା ତାକି ନାସାଆନି ଗାଞ୍ଜୁରମିତି ସିନିକିଅରି, ଏଦାଆଁତାକି ମସା ଏନିକଁ ତାନି ମୁମ୍ବୁଡ଼ି ହିମ୍ବୁରି ପୁକ୍ତା କଡ଼ିମାଚେସି, ମାମ୍ବୁ ଏଲେକଁ କିହିହିଲଅମି □

୧୪ ସାମା ଏଞ୍ଜାରି ବୁଦିତି କାଶକା ପଡ଼଼ି ଆହାମାନୁ, ଇଚିହଁ ନୀଞ୍ଜୁପାଚେକା ପୁଞ୍ଜଇ ରାଜିମାନା ପତି ପଡ଼଼ି ଆନାଟି ଏ ହିମ୍ବୁରି ପଡ଼ଗିନାୟି ନୀଏ ପାଚେକା ତୟାମାନେ, ଇଞ୍ଜା କ୍ରୀସ୍ତ ତାଣାଟି ଏ ହିମ୍ବୁରି ଗୁଚା ଆହାମାନେ, ଏଡ଼ି ତଞ୍ଜା ଆହିହିଲେଏ □

୧୫ ସାମା ନୀଏ ପାଚେକା ମସାତି ମେରା ପଡ଼଼ି ଆନାଟି ଏଞ୍ଜାରି ହିୟାଁ ହିମ୍ବୁରି ପୁକ୍ତା ଆହଁ ତୟିନେ □

୧୬ “ସାମା ଆମ୍ବାଆସି ଆପେସି ପ୍ରବୁ ଝାକି ଝେଣ୍ଡାଞ୍ଜଡ଼ିହଁ ଏଞ୍ଜାଣି ପୁକ୍ତା ଆହାମାନି ହିମ୍ବୁରି ଗୁଚାଆନେ □”

୧୭ “ପ୍ରବୁ” ଏ ଜୀଞ୍ଜୁ, ଇଞ୍ଜା ଏମ୍ବିୟା “ପ୍ରବୁତି ଜୀଞ୍ଜୁ” ମାନେ ଏମ୍ବାଆଁ ବାରେ ମେଲ୍ଲା ଆନାୟି ମାନେ □

୧୮ ସାମା ମାର ବାରେତାୟି ମୁମ୍ବୁ ପୁକ୍ତାଆନା ଦାପେଣିତା ମେହ୍ନି ଲେହେଁ ପ୍ରବୁତି ଗାଞ୍ଜୁରମି ମେସି ମେସିହଁ ଗାଞ୍ଜୁରମିତି ହାରେକା

ଗାଝୁରମି ଆହାନା ତାନି ଏ ଖାଣା ତଲେ ବାଦଲି ଆହିମାନାୟି; ଇଞ୍ଜା ପ୍ରବୁ ଆମ୍ବାଆସିକି ଜାଝୁ ଏଞ୍ଜାଣି ତାଣାଟି ଇ ବାରେ ଆହିମାନେ □

୪

ଇରଥା ତ:କା ବିତ୍ରା ନେହ୍ ଜାଝୁତି ଦନ

୧ ମାର ମାହାପୁରୁତି କାର୍ମା ବେଟାଆହାନା ଇ ସେବାକିନି ପାଣା ବେଟାଆହାମାନାକି ସାସା ହିଲାଆ ଲକୁଲେହେଁ ଆହାହିଲାଆୟି,

୨ ସାମା ମାମ୍ବୁଲ୍ଲଜା ଗାଟି ତଞ୍ଜା ଆଆଗାଟି ଲାଗେଏତି କାମା ପିସାମାନମି; ଇଞ୍ଜା ମାମ୍ବୁ ନାଡ଼ି କିଅମି ଅଡ଼େ ମାହାପୁରୁ କାତାତି ମିତି କାଲହାନା ଝେସିହିଲଅମି, ମାହାପୁରୁ କାନୁତା ନେହ୍ କାରୁତି ସାତା କିହ୍ ଝେକହାନା ବାରେଜାଣାତି ନେହ୍ ଅଣ୍ପୁ ତାକି ନେହ୍‌ତମି ତଞ୍ଜା ଆହିମାନମି □

୩ ଏନାଆଁତାକି ଇତିହ୍ ମାର ଝେକହାମାନି ନେହ୍ କାରୁ ତରୁା ମାତିହ୍, ଏଡ଼ି ଝାରଇ ଜାକ୍ମା ମାନାରାକି ତରୁାମାନେ □

୪ ମାହାପୁରୁ ଖାଣା ଲେହେଁତି କ୍ରୀସ୍ତ ତାନି ଗାଝୁରମିଗାଟି ନେହ୍ କାରୁତି ଉଜେଡ଼ି ଏନିକ୍ ଇଲେତି ଲକୁକି ତଞ୍ଜା ଆଏ, ଏଦାଆଁତାକି ନାମାଆଗାଗାଟି ବୁଦି ଦାରତିତି ପଲ୍ଲଆ ପେନ୍ଦୁ କାଣାୟାଁ କିହାମାନେ □

୫ ମାମ୍ବୁମାଜେତାକି ଝେସାକତିହିଲଅମି, ସାମା କ୍ରୀସ୍ତଇଁ ପ୍ରବୁ ଇଞ୍ଜା ଅଡ଼େ ଜୀସୁ କ୍ରୀସ୍ତ ତାକି ଜାହାରାଇଁ ମୀ ହଲିୟାଜାତମି ଇଞ୍ଜା ଝେକହି ମାନମି,

୬ ଏନାଆଁତାକି ଇତିହ୍ ଆମିନି ମାହାପୁରୁ ଏଲେଇଞ୍ଜାମାତେସି, “ଆନ୍ଦେରିତି ଉଜେଡ଼ି ତଞ୍ଜା ଆପେ,” ଏଞ୍ଜାସି କ୍ରୀସ୍ତତି ମୁମ୍ବୁତା ତଞ୍ଜା ଆହିମାନି ମାହାପୁରୁତି ଗାଝୁରମିଗାଟି ବୁଦିତି ଉଜେଡ଼ି ତସାଲି ତାକି ମା ହିୟାତି ଉଜେଡ଼ି କିହାମାନେସି □

୭ ସାମା ମାର ଝାରଇ ଇରଥା ତ:କାତା ଇ ଲାକପୁରୁତି ଦନ ବେଟାଆହାମାନାୟି □ ଇମ୍ବାଆଁ ପୁଣ୍ଡି ଆହିମାନେ ଇଲେତି ଲାକପୁରୁତି ବାଡ଼ୟୁ ମାଡ଼ି ଆଏ ସାମା ମାହାପୁରୁଖାୟି □

୮ ମାମ୍ବୁ ବୁଝାରେଲେହେଁତି ଦୁକୁ କସ୍ତ ବେଟାଆହାମାନମି, ସାମା ମାମ୍ବୁ ସୁଶୁକି ଆହି ହିଲଅମି □ ଏଚେ ଏଚେଲା ଆଡାଜାକା ଆଡି ଜିକେଏ ନୀରାସା ଆହାହିଲଅମି □

୯ ମାମ୍ବୁ ସୁସ୍ତି ବେଟା ଆହିମାନମି ସାମା ମାହାପୁରୁ ମାଙ୍ଗେ ଏଚେଲା ପିସାମାଞ୍ଜଅସି □ ଏଚେ ଏଚେକା ମାଡ଼ା ବେଟାଆହି ମାନମି ସାମା ନାସା ଆହାହିଲଅମି □

୧୦ ଜୀସୁତି ଜୀଝୁ ଏନିକିମ୍ ମା ତାଣା ତଞ୍ଜାଆନ୍ଦେ, ଏଦାଆଁତାକି ମାର ବାରେ ବେଲା ମା ଆଙ୍ଗାତା ଜୀସୁତି ହାକି ଡେକା ମାନାୟି □

୧୧ ଇଚିହିମ୍ ଜୀସୁତି ଜୀଝୁ ଏନିକିମ୍ ମା ହାନି ଆଙ୍ଗାତା ତଞ୍ଜାଆନ୍ଦେ, ଏଦାଆଁତାକି ମାର ନୀତାମାଟି ଜିକେଏ ବାରେବେଲା ଜୀସୁତି କସମି ହାକିତା ହେର୍ପି ଆହିମାନାୟି □

୧୨ ଇଲାଆହିମ୍ ମା ତାଣା ହାକି, ଅଡ଼େ ମୀ ତାଣା ଜୀଝୁ କାମା କିହିମାନେ □

୧୩ ରାସ୍ତି ଆହାମାନେ, “ନାନୁ ନାମିତାକି ଜଲିତେଏଁ □” ମାର ଏ ନାମୁତି ଜୀଝୁ ବେଟାଆହାମାନାୟି, ଇଞ୍ଜା ମାର ନାମାମାନାୟି ଏଦାଆଁତାକି ଝେକିହି ଜିକେଏ ମାନାୟି □

୧୪ ମାମ୍ବୁ ପୁଞ୍ଜାମାନମି, ମାହାପୁରୁ ପ୍ରବୁ ଜୀସୁଇଁ ହାକିଟି ଝେଣ୍ଡେ ନିକିହାମାନେସି □ ଏ ମାହାପୁରୁ, ଜୀସୁତଲେ ମାଙ୍ଗେ ଜିକେଏ ନିକିହାନେସି ଅଡ଼େ ମୀ ତଲେ ମାଙ୍ଗେ ତାନି ତାଗେ ଅୟାନେସି □

୧୫ ମୀ ନେହେଁତାକି ଇ ବାରେ ଆହିମାନେ □ ମାହାପୁରୁତି କାର୍ମାମେହନାୟି ଅଡ଼େ ହାରେ ଗାଡି ପାଡାଆହାନା ଲକୁଣି ତୀଗିଡେ, ଅଡ଼େ ହାରେକା ଲକୁ ରାହାଁ ଅଣ୍ପୁ ତଲେ ମାହାପୁରୁଇଁ ଗାଝୁରମି କିନେରି □

ନାମୁତି ଜୀଝୁ

୧୬ ଏଦାଆଁତାକି ମାମ୍ବୁ ଝାହା ହିଲଅମି, ସାମା ମା ଦାର୍ଡିତି ଆଙ୍ଗା ମେଣ୍ଡାଜିତି ଜିକେଏ ମା ହିୟାଁ ବିଡାତି ଜୀଝୁ ପୁଞ୍ଜାୟି ଆହିମାନେ □

୧୭ ଇଚିହିମ୍ ଇ ଗାଡ଼େକାଡି କସ୍ତ ହାରେକା ଗାଡି ମାଙ୍ଗେ ତାକି କାଲାକାଲା ରାଆଗାଟି ଗାଝୁରମି ତାନେ;

୧୮ ମାର୍ ତଞ୍ଜା ଆହିମାନାଣି ଗୁରି କିଆନା ତଞ୍ଜା ଆଆଗାଟାଣି ଗୁରି କିହିମାନାୟି; ଇଚିହିଁ ତଞ୍ଜା ଆହିମାନାୟି ଗାଡ଼େକା ତାକି, ସାମା ତଞ୍ଜା ଆଆଗାଟାୟି କାଲାକାଲାତାୟି □



୧୯ ମାର୍ ପୁଞ୍ଜାମାନାୟି, ଆମିନି ଦାର୍ତତି ତୁମ୍ବୁ ଲେହେଁତି ଇଲୁତା ନୀର୍ବ ମାର୍ ବାସା କିହାମାନାୟି, ଏଦି ନସ୍ତୁ ଆଡ଼ିସାରେ ମାହାପୁରୁ ମାଙ୍ଗେ ଲାକପୁରୁ ର କାଲାକାଲାତି ଇଲୁ ମେଡ଼ି କିୟାନେସି □ ଏଦି ମାଣ୍ଡି କେୟୁଟି କେପିତାୟି ଆଏ, ମାହାପୁରୁ ତାନ୍ତୁଏ ଏଦାନି ଗାଡ଼କିତାସି □

୨୦ ଇ ଦାର୍ତତି ଇଲୁତା ମାଞ୍ଜାନା ମାର୍ ଲାକପୁରୁ ଇଲୁତି ହିମ୍ବୁରି ହୁଚାଲି ମନ୍ କିହାନା ଡ଼ାହି ମାନାୟି □

୨୧ ସାମା ଲାକପୁରୁତି ବାସା ଟାୟୁତା ହଡ଼ିସାରେ ମାର୍ ଆଙ୍ଗା ହିଲଆଗାଟାୟି ଆଆନା ନାଗ୍ଡ଼ା ତଞ୍ଜା ଆଆୟି □

୨୨ ଇଚିହିଁ ମାର୍ ଇ ଦାର୍ତତି ତୁମ୍ବୁତା ବାସା ଆହାନା ବଜୁଗାଟି ହିୟା ତଲେ ଡ଼ାହି ମାନାୟି; ଇଚିହିଁ ମାର୍ ଦାର୍ତତି ଆଙ୍ଗା ପିସାଲି ଅଣ୍ଡିମାନାୟି ଏଦି ଆଏ, ସାମା ଜୀଞ୍ଜୁ ଏନିକ୍ ଦାର୍ତତି ନାସାକିନେ, ଇଦାଆଁତାକି ଇ ହାନି ଆଙ୍ଗାତି ମୁହେଁ ଲାକପୁରୁତି ହିମ୍ବୁରି ହୁଚାଲି ମାର୍ ମନ୍ କିହିମାନାୟି □

୨୩ ମାହାପୁରୁ ମାଙ୍ଗେ ଇ ବାଦଲଞ୍ଜି ଆନାଣି ତାକି ତିୟାରା କିହାଁ ମାଞ୍ଜାନେସି □ ଅଡ଼େ ଇଦାଣି ତୀରପୁକିନାଣି ଲେହେଁ ତାନି ସୁଦୁଜୀଞ୍ଜୁ ଏଞ୍ଜାସି ମାଙ୍ଗେ ହାହାମାଞ୍ଜାନେସି □

୨୪ ଏଦାଆଁତାକି ମାମ୍ବୁ ବାରେରେଲ୍ଲା ସାସା ଆସାମାନମି □ ମାମ୍ବୁ ପୁଞ୍ଜାମାନମି, ଏଚରଦିନା ପାତେକା ଇ ଆଙ୍ଗାତା ବାସା କିହାମାନମି, ଏଚରଦିନା ପାତେକା ପ୍ରବୁତି ଇଲୁଟି ହେକ ମାଞ୍ଜାନା ନୀତା ବାଡ଼କିମାନମି,

୨୫ ଏଦାଆଁତାକି ଇଚିହିଁ ମାର୍ ତଞ୍ଜାଆହିମାନି ଦିଶ୍ସୁ ଲାକ ଆଏ ସାମା ନାମ୍ବୁ ଲାକ ନୀତା ବାଡ଼କି ମାନାୟି □

୨୬ ଏଦାଆଁକି ଇଚିହିଁ ମାମ୍ବୁ ସାସା ଗାଗାତମି, ଇଞ୍ଜା ଇ ଆଙ୍ଗା ପିସାନା ପ୍ରବୁ ତଲେ ବାସା କିହାଲି ମାମ୍ବୁ ହାରେକା ରାହାଁ □

୯୮ ଏଦାଆଁତାକି ଇମ୍ପାଆଁ ଜାହାରା ଇଲୁତା ମାଟିହୁଁ କି ହେକ ରାକ୍ତି ମାଟିହୁଁ ଜିକେଏ, ମାହାପୁରୁଇଁ ରାହାଁ କିନାୟି ଏ ମା ରଣ୍ଡିଏ ଅଣ୍ଡୁ
□

୯୯ ଇଟିହୁଁ ନେହେଁ ଆପେ କି ଲାଗେଏ ଆପେ, ବାରେଜାଣା ଜାହାରା ଆଜ୍ଞା ତଲେ କିତି କାମାତି ଲେକାତଲେ ପାଡ଼େୟି ବେଟାଆହାଲି ତାକି କ୍ରୀସ୍ତତି ନାହାଁୟି କିନି ଟାୟୁ ନକିତା ବାରେତାୟି ମାଜେ ନିକା ହାଜାଲି ଆନେ □

କ୍ରୀସ୍ତ ତାଣାଟି ମାହାପୁରୁତି ତ଼ଣେସିଜ୍ଞା ଆନାୟି

୧୦ ପ୍ରବୁଇଁ ଆଜିନାଣି ପୁଞ୍ଜାମାନାକି ମାମ୍ବୁ ମୁାଣ୍ଡିୟାଁଇଁ ମାଡ଼ିକିହି ମାନମି, ସାମା ମାମ୍ବୁ ମୁାହାପୁରୁ ନକିତା ତଞ୍ଜା ଆହାମାନମି ଇଞ୍ଜା ମୀ ଅଣ୍ଡୁତା ଜିକେଏ ତଞ୍ଜା ଆହାମାନମି, ଇ କାତା ନାମୁ ଆସା କିହିମାଇଁ
□

୧୧ ମାମ୍ବୁ ମୁୀ ତାଣା ଅଡ଼େ ବଡ଼ପଣ ତସାଲି କିହିହିଲଅମି, ସାମା ଲକ୍ଷୁତି ନେହୁଁ ଅଣ୍ଡୁ ତାକି ବଡ଼ପଣ ତହୁଆନା ଝାରଇ ଏଝାରି ଆଜ୍ଞାତି ରାହାଁତାକି ବଡ଼ପଣ ତହୁନାରାଇଁ ମୀରୁ ଝେଣ୍ଡେ ଝେସାଲି ଆଡ଼ିଦେରି, ଏଦାଆଁତାକି ମୀରୁ ମା ତାକି ବଡ଼ପଣ ତସାଲି ଆଡ଼ିଦେରି ଇଞ୍ଜୁଁ ଝେସିମାଞ୍ଜାନମି □

୧୨ ମାମ୍ବୁ କି ବୁଦି ହିଲଆ ଗାଟାତମି ? ଏଦି ମାହାପୁରୁ ତାକି ଆହାମାନେ ମାମ୍ବୁ କି ବୁଦିଗାଟାତମି ଆହାମାନମି ? ମା ନେହେଁ ମାଟିସାରେ, ମୀ ତାକି ଏଲେଆହୁଁ ମାନମି □

୧୩ ଇଟିହୁଁ କ୍ରୀସ୍ତତି ଜୀଝୁ ନନି ତାଣାଟି ସାଲଞ୍ଜି ଆହିମାନାୟି, ଏଦାଆଁତାକି ମାର ଇ କାତା ଅଣ୍ଡିମାନାୟି, ରଅସି ବାରେଜାଣା ତାକି ହାହାମାନାକି ବାରେଜାଣା ଏ ହାକିତା ଆଣ୍ଡୁମାନେରି □

୧୪ ଏଝାସି ବାରେଜାଣା ତାକି ହାହାମାନାକି ଆମିନି ଗାଟାରି ନୀତାମାନେରି, ଏଝାରି ଅଡ଼େ ଜାହାରାତାକି ନୀତାଆନା ଏଝାଣି ତାକି ନୀତିନେରି, ଏଦାଆଁତାକି ଇଟିହୁଁ ଏଝାରି ତାକି ଏଝାସି ହାହାନା ଝେଣ୍ଡେ ନୀତାମାନେସି □

୧୫ ଇଦାଆଁତାକି ମାମ୍ବୁ ଆମ୍ବାଆରାଇଁ ମାଣ୍ଡି ଅଣ୍ଡୁ ତଲେ ବିଚାରା କିହିଲଅମି □ ଦିନା ମାଟେ ଏଟିବେଲ୍ଲା ମାମ୍ବୁ କ୍ରୀସ୍ତଇଁ ଜିକେଏ

ମାଣସି ଅଶ୍ୱପୁ ତଳେ ଅଶ୍ୱପିମାରମି, ସାମା ନୀର୍ଘ୍ନ ମାନ୍ସୁ ଅଡ଼େ ଏଲେ କିହିହିଲଅମି □

୧୭ ଇଦାଆଁତାକି ଆମ୍ବାଆସି କ୍ରୀସ୍ତ ତାଣା ମାନେସି ଆତିହିଁ ଏଞ୍ଜାସି ପୁଃନି ଗାଡ଼ି ଆହାମାନେସି □ ପ୍ଲୁଃଆୟି ବାରେ ମେଣ୍ଟାମାନେ, ମେହ୍ଦୁ ପୁଃନାୟି ବାରେ ଆହାମାନେ □

୧୮ ଇ ବାରେ ମାହାପୁରୁ ତାଣାଟି ଆହାମାନେ, ଏଞ୍ଜାସି କ୍ରୀସ୍ତ ତାଣାଟି ମାଙ୍ଗେ ତାନିତଲେ ଅଡ଼େ ଆର୍ହା ମାଞ୍ଜାନେସି ଇଞ୍ଜା ତାନିତଲେ ସେବାକିନି ପାଣା ଆର୍ହାଲି ଏଞ୍ଜାସି ମାଙ୍ଗେ ଦାୟିପତି ହୀହାମାଞ୍ଜାନେସି □

୧୯ ଏ ଆଣ୍ଡିନି ବଲୁ ଇଦି, ମାହାପୁରୁ କ୍ରୀସ୍ତ ତାଣା ଦାର୍ତତି ତାନିତଲେ ଆର୍ହାମାରେସି; ଏଞ୍ଜାସି ଦାର୍ତତି ଲକ୍ୱୁତି ଦହ୍ ଆହ୍‌ଆନା ଏ ଆଣ୍ଡିନି ବଲୁତି ମା ତାଣା ହେରପା ମାଞ୍ଜାନେସି □

୨୦ ଏଦାଆଁତାକି ମାହାପୁରୁ ମା ଝାକିଟି ହାଟିମାଞ୍ଜାନାକି ମାର କ୍ରୀସ୍ତତି ଝାକିଟି ରାଜାତି କାତୁ ଝେହ୍‌ନାତାୟି ଆହାମାନାୟି; କ୍ରୀସ୍ତ ତଳେ ମାର ବାତିମାଲି ମାଞ୍ଜାନମି, ମାହାପୁରୁ ତଳେ ଅଡ଼େ ଆଣ୍ଡାଦୁ □

୨୧ ଇତିହିଁ କ୍ରୀସ୍ତକି ଇତାୟି ପାପୁ ହିଲାଆତି ଜିକେଏ, ମାହାପୁରୁ ତାଙ୍ଗେ ମା ତାକି ପାପୁ ଗାଟାଣିଲେହେଁ କିତେସି, ମାର ଏନିକି ତାନିତଲେ ଆଣ୍ଡାନା ମାହାପୁରୁତି ଦାମ୍‌ତା ଆଣ୍ଡାଲି ଆଡ଼ିନାୟି □



୧ ମାହାପୁରୁ ତଳେ ଆଣ୍ଡା ଆହାନା କାମା କିହିମାନାକି ମାନ୍ସୁ ମିଙ୍ଗେ ବାତିମାଲି ମାଞ୍ଜାନମି, ମୀ ଜୀଝୁତା ମାହାପୁରୁତି କାର୍ମାମେହ୍‌ନାଣି ଉଜେଏ କିଆଦୁ □

୨ ମାହାପୁରୁ ଏଲେଇଞ୍ଜା ମାନେସି,
 “ମିଙ୍ଗେତାକି କାର୍ମା ମେସ୍ତାନି ଦିନା ଝାହାଲିଏ ନାନୁ ମୀ ଗହାରା
 ଝେରେଏ,
 ଗେଲ୍‌ପିନି ଦିନା ନାନୁ ମୀ ସାରେମି ଆୟାତେଏ”
 ମେହ୍‌ଦୁ, ଇଦି ଆହିମାନେ ମାହାପୁରୁତି କାର୍ମାମେହ୍‌ନାଣି ବେଟାଆନି
 ବେଲା □ ନୀଞ୍ଜୁ ଆହିମାନେ ଗେଲ୍‌ପିଆନି ଦିନା □

୩ ଏନିକିମ୍ ମା ସେବା କାମା ନିନ୍ଦା ଆଏ, ଏଦାଆଁତାକି ମାମ୍ମୁ
ଆମ୍ବାଆରି କାମାତା ବାଦା ହାଆପ ଇଞ୍ଜି ଅଣ୍ଡିମାନମି □

୪ ଏଦାଆଁତାକି ମାମ୍ମୁ ବାରେବେଲା ମାହାପୁରୁତି ସେବା କିନାରା
ଲେହେଁ ତସାକତିମାନମି, ସାମା ଆଟ୍‌ଝା ତଲେ ବାରେଲେହେଁତି
ବାଦାତା, ହିଲାଆ ବେଲାତା କସ୍ତୁ ଅରୁହିମାନମି,

୫ ମାମ୍ମୁମାଡ଼ା ବେଟାଆହାନା, କାୟିଦିତା, ଲକୁ ନକିତା ନିନ୍ଦା
ବେଟାଆହାନା, ଇଞ୍ଜା ଝାହୁ କାମାତା, ଇଦା କିଆନା, ରାନ୍ଦା
ତିନାଆନା ମାଚମି,

୬ ସୁଦୁଟି, ବୁଦିଟି, ଅରୁହିନି ତାଣାଟି, କାର୍ମାମେହ୍ନି ତାଣାଟି,
ସୁଦୁଜୀଝୁତା, କୁଟୁ ହିଲାଆନା ଜୀଝୁନନ୍ଦାୟି,

୭ ଅଡ଼େ ସାତା ନେହ୍ନି ବଲୁତା, ମାହାପୁରୁତି ବାଡ଼ୟୁ ତଲେ,
ଟିଝନି ଟେବୁ କେୟୁଟି ଦାମ୍ପୁତି ସାକୁ ତଲେ,

୮ ଗାଝୁରମି ଅଡ଼େ ଅପାଆ ତାଣା, ମାମ୍ମୁମାନ୍ଦି ବେଟାଆହି ମାନମି
ଇଞ୍ଜା ଲାଜା ବେଟାଆହି ମାନମି; ଇଞ୍ଜା ନାଡ଼ିକିଝି ଆହିମାନମି,
ଆଡ଼ିଜିକେଏ ସାତା ଗାଟାତମି □

୯ ପୁଣ୍ଡି ଆଆତି ଲକୁ ଲେହେଁ, ଆଡ଼ି ଜିକେଏ ନେହ୍ନି
ପୁଣ୍ଡିଆଡ଼ି ଲକୁ, ହାଡ଼ାରି ଲେହେଁ ଆଡ଼ି ଜିକେଏ ମେହ୍ନୁ ମାମ୍ମୁ
ନୀତାମାନମି, ମାମ୍ମୁ ତୁଣ୍ଡି ବେଟାଆହାମାନମି ସାମା ହାହା ହିଲଅମି,

୧୦ ମାମ୍ମୁ ତୁକୁତଲେ ମାଟିହ୍ନି ଜିକେଏ ବାରେବେଲା ରାହାଁ ତଲେ
ମାନମି, ମାମ୍ମୁ କ୍ଳାକୁଲି ଗାଟାତମି ଲେହେଁ, ସାମା ହାଡ଼ରକା ଲକୁତାକି
ବାଡ଼କା ମାନମି, ମାଞ୍ଜେ ଏନ୍ଦାୟି ହିଲାଆଲେହେଁ ସାମା ମାମ୍ମୁ
ସାତାତଲେ ବାରେତି ଅଦିକାରା ଗାଟାତମି; ଇ ବାରେତାଣା ମାମ୍ମୁ
ମାହାପୁରୁତି ସେବା କିନାତମି ଲେହେଁ ଜାହାରାଈଁ ଜଗେ ଗାଟାତମି
ଇଞ୍ଜି ତସାକତି ମାନମି □

୧୧ କରନ୍ତିତା ମାନି ଜୀଝୁତି ତାୟିୟାଁ ଅଡ଼େ ତାଈଁମ୍ବାତେରି, କୁଟୁ
ହିଲାଆଲେହେଁ ମିଞ୍ଜେ ବାରେ ଝେସା ମାଞ୍ଜାନମି □ ମୀ ତାଣା ମା
ହିୟାଁ ଦେଟାମାନମି □

୧୨ ମିଞ୍ଜେତାକି ମା ଜୀଝୁନନ୍ଦାୟି ଉଣା ଆହା ହିଲେଏ ସାମା ମା
ତାକି ମୀ ଜୀଝୁନନ୍ଦାୟି ଉଣା ଆହାମାନେ □

୧୩ ମିଙ୍ଗେ ନା ମୀରକା ମାସକା ଇଞ୍ଜି ଅଣ୍ଠାପାନା ଇ ବାରେ
 ଝେସିମାଞ୍ଜାଇଁ, ମାମ୍ବୁ ଜୁାଝୁନହଁ ମାଞ୍ଜାନାକି ମୀ ହିୟାଁ ଦେପି ଆପେ
 □

ଲାଗେଏ ତାଣାଟି ଜାଗ୍ରାତା କିନାୟି

୧୪ ମୀରୁ ନାମାଆଗାଟାରି ତଲେ ରଲେଏତାତେରି ଆଡ଼ି ଲେହେଁ
 କାମା କିଆଦୁ, ଦାମ୍ବୁ କାମାତା ଲାଗେଏତି କାମା ଏନିକଁ ଆଣ୍ଠିନେ
 ? ଅଡ଼େ ଆନ୍ଦେରି ତଲେ ଉଜେଡ଼ି ଏନିକଁ ଆଣ୍ଠିନେ ?

୧୫ କ୍ରୀସ୍ତ ଇଞ୍ଜା ବିଲିୟାର୍ ଏନିକଁ ଜାଗୁ ଆନ୍ଦେରି ? ନାମିତାରି
 ଇଞ୍ଜା ନାମାଆତାରି ଆମିନି କାତାତା ରଣ୍ଠିଏ ଆନ୍ଦେରି ?

୧୬ ✱ମାହାପୁରୁତି ଇଲୁତା, ଏନିକଁ ପେଣ୍ଠାକାତି ପୁଜା ଆନ୍ଦେ ?
 ସାମା ମାର ନୀତାମାନି ମାହାପୁରୁତି ଇଲୁତାୟି, ଇତିହଁ ମାହାପୁରୁ
 ତାନୁଏ ଏଲେଇଞ୍ଜା ମାନେସି,

“ନା ଲକୁତଲେ ନାନୁ ବାସା କିଇଁ,
 ଅଡ଼େ ଏଞ୍ଜାରିତଲେ ମାଇଁ,
 ନାନୁ ଏଞ୍ଜାରି ମାହାପୁରୁ ଆଇଁ,
 ଅଡ଼େ ଏଞ୍ଜାରି ନା ଲକୁ ଆନ୍ଦେରି □”

୧୭ ଏଦାଆଁତାକି ପ୍ରବୁ ଏଲେଇଞ୍ଜା ମାନେସି,
 “ମୀରୁ ଏଞ୍ଜାରି ତାଣାଟି ହଡ଼ା ଝାଦୁ,
 ଏଞ୍ଜାରି ତାଣାଟି ଏଟକା ଆଦୁ,
 ଏନି ଲାଗେଏତି ଦିଶ୍ଟୁ ତୀଗାଆଦୁ,
 ଆତିହଁ ନାନୁ ମିଙ୍ଗେ ଆବାଇଁ,

୧୮ ନାନୁ ମୀ ଆବା ଆଇଁ,
 ଅଡ଼େ ମୀରୁ ନା ମୀରକା ମାସକାତେରି ଆଦେରି,
 ବାରେକିହାଁ ବାଡ଼ୁୟାଗାଟି ପ୍ରବୁ ଇଦାଆଁ ଝେସିମାଞ୍ଜାନେସି □”

୭

୧ ଇତିହଁ, ଏ ତାୟିୟାଁ ଅଡ଼େ ତାଙ୍ଗିସ୍ତାତେରି, ଇ ବାରେ
 ଆଞ୍ଜାମାତାଣି ମୋଡ଼ା ଆହାମାନାକି ଝାଦୁ, ମାର ମା ଆଙ୍ଗା ଅଡ଼େ

ଜୀବୁତି ଲାଗେଏ ତାଣାଟି ଆଟୁହା କଡିନ, ଇଞ୍ଜା ମାହାପୁରୁଇଁ
ଆଜାନା ସୁଦୁ ମାଣ୍ଡକିତା ନେହୁଁ ଆନୁ □

ପାଞ୍ଜୁଲତି ରାହୁଁ

୨ ମୀ ହିୟାତା ମାଜେ ଚାନ୍ତୁ ହିୟାଦୁ, ମାନ୍ତୁ ଆମ୍ବାଆରାଇଁ ଲାଗେଏ
କିହାହିଲଅମି, ଆମ୍ବାଆରାଇଁ ନାସା କିହାହିଲଅମି କି ଆମ୍ବାଆରାଇଁ
ବୁଡ଼ି କିହାହିଲଅମି □

୩ ନାନୁ ମିଜେ ଦହ ଦସାଲି ଇଦାଆଁ ଝେସିମାଞ୍ଜଅଁ; ଇତିହୁଁ
ନାନୁ ତଲିଏ ଝେସାମାଞ୍ଜାଇଁ, ମୀରୁ ମା ହିୟାତା ଏଚେକା ଚାନ୍ତୁ
ବେଟାଆହାମାନାକି ମାର ହାଡ଼ିହୁଁ ରଣ୍ଡିଏ ତାଣା ହାନ, ନୀତିତିହୁଁ
ରଣ୍ଡିଏ ତାଣା ନୀତିନ □

୪ ମୀ ତାଣା ନାଜେ ହାଚେକା ନାମୁ ମାନେ, ମିଜେତାକି ନାଜେ
ହାଚେକା ବତପଣ ହଡ଼ି ମାଞ୍ଜାନେ; ନାନୁ ଦୁକୁ ତୁକହା ମାଇଁ, ମା
ବାରେ କସ୍ତା ନାନୁ ସାସା ଆହାମାଇଁ, ଅଡେ ନା ହିୟାତା ରାହୁଁ
ହଡ଼ିମାଞ୍ଜାନେ □

୫ *ମାକିଦନିୟାତା ଏଜାଲିଏ ଜିକେଏ ପାଙ୍ଗାତା ଗଡ଼ହା ବିତ୍ରା
ଆଜି, ଇଲେତି କସ୍ତ ବେଟାଆହାଲିଏ ମା ଆଙ୍ଗା ଜିକେଏ ଜମାଲି
ପୁଃଆଡେ □

୬ ସାମା ହେଲା ଗାଟାରାଇଁ ସାସା ହାନି ତିତସଇଁ ମାହାପୁରୁ
ପାଣ୍ଡାନା ମାଜେ ସାସା ହିୟାଡେସି □

୭ ଖାରଇ ତାନି ଖାଡାକି ରାହୁଁ ଆଏ, ସାମା ଏଝସି ମୀ ତାଣା
ହାଜାନା ଏମିନି ସାସା ବେଟାଆହାମାନେସି □ ଏମ୍ବାଟି ମାଜେ ସାସା
ହିୟାଡେସି, ଏଚେକା ନାଜେ ମେସାଲି ମୀରୁ ଅଣ୍ଡିମାଞ୍ଜେରି,
ଏଚେକା ମୀରୁ ଦୁକୁ କିହିମାଞ୍ଜେରି, ମୀରୁ ନା ତାଣା ବାସୁଁ ଇଟାଲି
ଏଚେକା ତିୟାରା ଆହାମାଞ୍ଜେରି, ଏଦାଆଁତାକି ନାନୁ ନୀର୍ବ ହାଚେକା
ରାହୁଁ ଆହିମାଇଁ □

୮ ନାନୁ ନା ତଲିତି ଆକୁତା ମିଜେ ଦୁକୁ ହାହାମାଞ୍ଜାତିହୁଁ ଜିକେଏ
ଏଦାଆଁତାକି ଦୁକୁ ଆଏ; ଏ ଆକୁ ଗାଡ଼େକା ତାକି ମିଜେ ଦୁକୁ ହାହା
ମାଞ୍ଜାନାଣି ମେସାନା ନାନୁ ଦୁକୁ ଆଡ଼ିଜିକେଏ

୯ ନୀର୍ବ ରାହାଁ ଆହାମାଇଁ, ମୀରୁ ନୀର୍ବ ଦୁକୁ ଆଡେରି ଏଦାଆଁତାକି ଆଏ, ସାମା ମୀ ଦୁକୁ ମିଙ୍ଗେ ମନ ଖେଟ୍ପି କତାକି ରାହାଁ ଆହାମାଇଁ; ଇଚିହଁ ମା ତାଣାଟି ମୀଦି ଏନାୟିଝା ବୁଡ଼ି ଆଆପେ, ଏଦାଆଁତାକି ମୀରୁ ମାହାପୁରୁ ତାଣାଟି ଦୁକୁ ବେଟା ଆହାମାଞ୍ଜେରି □

୧୦ ମାହାପୁରୁ ତାଣାଟି ଖାନି ଦୁକୁ ଗେଲପାଲିତାକି ମନ ଖେଟ୍ପି କିଞ୍ଜିକିନେ, ଏଦାଆଁତାକି ଅଣ୍ପିନାୟି ଲଡ଼ା ହିଲେଏ; ସାମା ଇ ଦାରତିତି ଦୁକୁ ହାଞ୍ଜିକିନେ □

୧୧ ମେହଦୁ ମାହାପୁରୁତି ମନତଲେ ଆମିନି ଦୁକୁ ବେଟାଆଡେରି, ଏଦି ମୀ ତାଣା ଏଚେକା ରାହାଁଗାଗାୟି, ହାଅ, ମୀ ଦହ ହିଲଆଗାଗାଣି ତସାମାନେ, ହାଅ ଏଚେକା ଅଣ୍ପୁ, ଏଚେକା ଆଜି, ଏଚେକା ମନ, ଏଚେକା ସେବା, ଲାଗେଏତାଣି ତଣ୍ଡ ହାହାଲି ଏଚେକା ଅଣ୍ପୁ, ଏ ବାରେ ତାଣାଟି ମୀରୁ ଅଟହାଡେରି ଇଞ୍ଜି ତଞ୍ଜା ଆହାମାଞ୍ଜେରି □

୧୨ ଇଦାଆଁତାକି ନାନୁ ମୀ ତାଣା ଏ ଆକୁ ରାଡିଡେଏଁ, ଆତିହଁ ଜିକେଏ ଆମ୍ବାଆସି ଲାଗେଏ କିହାମାନେସି, କି ଆମ୍ବାଆସି ଲାଗେଏତାଣି ଅରହା ମାନେସି, ଏଞ୍ଜାଣାକି ରାଡିଡେଏଁ, ଏଦି ଆଏ, ସାମା ମାଙ୍ଗେ ତାକି ମୀ ରାହାଁ ଏନିକଁ ମାହାପୁରୁ ନକିତା ମୀ ତାଣା ସାତେଏ ଇଞ୍ଜି ତଞ୍ଜାଆନେ, ଏଦାଆଁତାକି ରାଡିଡେଏଁ □ ଇଚିହଁ, ମାମ୍ବୁସାସା ବେଟାଆହାମାନମି □

୧୩ ଅଡେ ମା ବାସୁତା ମାମ୍ବୁତିତସ ରାହାଁତାକି ହାରେକା ରାହାଁ ଆଡମି, ଇଚିହଁ ଏଞ୍ଜାଣି ଜୀଞ୍ଜୁ ମୀ ବାରେ ଜାଣା ତାଣାଟି ରାହାଁ କିହାମାଞ୍ଜେରି □

୧୪ ଆତିହଁ ଏନି କାତା ତିତସ ତାଣା ମୀ ତାକି ନାନୁ ବଡପଣ କିହାମାଇଁ, ଆତଁ ଲାଜା ଆହାହିଲଅଁ, ସାମା ଏନିକଁ ମୀର ବାରେ କାତାତା ମିଙ୍ଗେ ସାତା ଖେସାମାଞ୍ଜାତମି, ଏଲେକିହଁ ତିତସ ନକିତା ମା ବଡପଣ ଆନାୟି ଜିକେଏ ସାତା ଇଞ୍ଜି ପୁଣ୍ଡିଆହାମାନେ □

୧୫ ଇଞ୍ଜା ମୀରୁ ଏନିକଁ ଆଜି ଅଡେ ତୀରଗିହଁ ଏଞ୍ଜାଣାଇଁ ଆବାହାଁ ଏଞ୍ଜାଣି ତାଣା ବାରେଜାଣା ଡେରି ମାନଞ୍ଜି ଆଡେରି, ଏ ବାରେ ଅଣ୍ପାମା ମିଙ୍ଗେତାକି ତାନି ହିୟାତା ଜୀଞ୍ଜୁନନାୟି ହାରେକା ପାତା ଆଡେ □

୧୭ ନାନୁ ବାରେ ତାଣାଟି ମିଙ୍ଗେ ହାରେକା ନାମାଲି ଆଡ଼ାଈ ଏଦାଆଁତାକି ନାଙ୍ଗେ ହାରେକା ରାହାଁ ହଡ଼ିମାଞ୍ଜାନେ □

୮

କ୍ରୀସ୍ତାନା ଲକୁ ଦାନା ହାନାୟି

୧ ଏ ମା ତାୟିୟାଁ ଅଡ଼େ ତାଙ୍ଗିସ୍ତାତେରି, ମାକିଦନିୟା କୁଲମିକାଣା ମାହାପୁରୁ ହାହାମାନି କାର୍ମାମେହନାଣି ବେଟାଆହାମାନେ, ଏଦାଆଁ ମାମ୍ବୁ ମିଙ୍ଗେ ଝେସିମାଞ୍ଜାନମି;

୨ ଏଞ୍ଜାରି ବେଟାଆହାମାନି ହାରେକା କସ୍ତତଲେ ତାୟିପାରି କିଞ୍ଜି ଆହାମାନେରି; ଏଞ୍ଜାରି ହାରେକା ହାକି କାକୁଲି ଗାଟାରି ଇଚିହିଁ ଜିକେଏ; ଜାହାରା ଅଣ୍ପୁ ତଲେ ତାମି ଦାନା ହାନି ତାଣା ଏଞ୍ଜାରି ରାହାଁ ହାରେକା ମାଟେ □

୩ ଏନାଆଁତାକି ଇଚିହିଁ ନାନୁ ସାକି ହାହିମାଈ, ଏଞ୍ଜାରି ଆଡ଼ିନି ପାତେକା, ସାମା ଏଞ୍ଜାରି ଆଡ଼ିନି ବାଡ଼ୁୟୁ କିହାଁ ଜିକେଏ ହାରେକା ଗାତି ଦାନା ହାହାମାନେରି □

୪ ଜୀହୁଦାତା ମାନି ମାହାପୁରୁ ଲକୁତି ସେବା କାମାତା ଆଣ୍ଡୁଆନି କାର୍ମାମେହନାଣି ମେଡ଼ା ଆହାଲିତାକି ଏଞ୍ଜାରି ଜାହାରା ଅଣ୍ପୁ ତଲେ ବାଡ଼ିମାଲିହିଁ ମାଙ୍ଗେ ହେଲ ରୀସ୍ତାତେରି;

୫ ଏଞ୍ଜାରି ଝାରଇ ମା ଆସା କିହାମାନିଲେହେଁ କିହାହିଲାଆତେରି, ସାମା ମାହାପୁରୁ ମନତଲେ ସାଲୁଞ୍ଜି ଆହାନା ତଲିଏ ଜାହା ଜାହାରାଈ ପ୍ରବୁ ତାଣା ଇଞ୍ଜା ମା ତାଣା ହେରପାତେରି □

୬ ତିତସ ମୀ ତାଣା ଏ କାର୍ମାମେହନି କାମା ଏନିକିଁ ମାଟୁହା ମାଟେସି, ଏଲେକିହିଁ ଏ ଏଦାଆଁ ରାପ୍‌ହାଲି ଏଞ୍ଜାଣାଈ ସାସା ହୀତମି □

୭ ମାରୁ ବାରେ ତାଣାଟି ନକିତା ଆହାମାଞ୍ଜେରି, ଇଚିହିଁ ନାମ୍ବୁ କହୁଗାଟାରି, ବୁଦି ଇଞ୍ଜା ବାରେଲେହେଁତି ରାହାଁ, ମିଙ୍ଗେତାକି ମା ଜୀଞ୍ଜୁନନାୟି, ଏଲେକିହିଁ ବାରେ କାତା ଏନିକିଁ ମୀ ତାଣା ହାରେକା ତଞ୍ଜା ଆହିମାନେ, ଏଲେକିହିଁ ଏ ଇ କାର୍ମାମେହନି କାମା ଜିକେଏ ମୀ ତାଣା ହାରେକା ତଞ୍ଜାଆପେ □

୮ ନାନୁ ହୁକୁମି ହୀନି ଲେହେଁ ଝେସିମାଞ୍ଜଅଁ, ସାମା ଅର ଲକୁତି ରାହାଁ ଆହାଲି ତସାନା ମୀ ଜାଝୁନନାୟି ସାତା କି ଆଏ ତାୟିପାରି କିହାଲି ଝେସିମାଞ୍ଜାଈଁ □

୯ ଇଚିହଁ ମା ପ୍ରବୁ ଜୀସୁ କ୍ରୀସ୍ତତି କାର୍ମାମେହନାଣି ମୀରୁ ପୁଞ୍ଜାମାଞ୍ଜେରି, ମୀରୁ ଏନିକଁ ଏଞ୍ଜାଣି ହିଲାଆଗାଟି ତାଣାଟି ଦନ ଗାଗାତେରି ଆଦେରି, ଏଦାଆଁତାକି ଏଞ୍ଜାସି ଦନଗାଗାସି ଆଡ଼ିଜିକେଏ ମୀ ତାକି ହିଲାଆଗାଗାସି ଆଡ଼େସି □

୧୦ ଏଦାଆଁତାକି ନା ଅଣ୍ପୁ ଇଦି, ଏ ବାରେ ମିଙ୍ଗେତାକି ନେହେଁ, ଏନିକିହଁ ଡାଣ୍ଡୁଟିଏ ମୀରୁ ମୂଲୁଏ କାମା ମାଟ୍‌ହେରି, ଏଦି ଆଏ, ସାମା ଏ କାମା କିୟାଲି ନକେଏ ଜିକେଏ ଅଣ୍ପାମାତେରି □

୧୧ ନୀଏଁ ଏ କାମା ଜିକେଏ ରାପ୍‌ଦୁ, ମୀରୁ ଏ କାମା କିହାଲି ଏନିକଁ ଅଣ୍ପାମାତେରି, ଏଲେକିହଁ ରାହାତି ଅଣ୍ପୁ ତଲେ ଏ କାମା ରାନ୍‌ନେ □

୧୨ ଇଚିହଁ ହୀହାଲିତାକି ରାହାଁ ମାରିହଁ ମାଣ୍‌ସି ତାନି ଆଡ଼ିନିଲେହେଁ ଏନାଆଁ ହୀନେସି, ମାହାପୁରୁ ନକିତା ନେହାୟି ଆନେ □

୧୩ ଇଚିହଁ ଏଟ୍‌କାତାରି ଏନିକଁ ସୁକୁ ବେଟାଆନେରି, ଇଞ୍ଜା ମୀରୁ କସ୍ତ ବେଟାଆଦୁ, ଏଦାଆଁତାକି ନାନୁ ଇଦାଆଁ ଝେସିମାଞ୍ଜଅଁ;

୧୪ ସାମା ସମାନା ଆହାଲିତାକି ନୀଏଁ ମୀ ବାଡ଼କୁ ତଲେ ଏଞ୍ଜାରି ଲଡ଼ା ମାନାଣି କିଞ୍ଜି ଆହିମାନେ, ଏନିକିହଁ ଏଞ୍ଜାରି ବାଡ଼କୁ ତଲେ ମୀ ହିଲାଆଗାଗାଣି ପୁରା କିଞ୍ଜିଆନେ, ଇଞ୍ଜା ଇଲେଆହଁ ସମାନା ତଞ୍ଜାଆନେ,

୧୫ ଦାମ୍‌ପତିତା ଏନିକିହଁ ରାସ୍‌କି ଆହାମାନେ, “ଆମ୍ବାଆସି ହାରେକା କୁଡ଼ି କିତେସି, ଏଞ୍ଜାଣିଞ୍ଜାୟି ହାରାଆତେ, ଇଞ୍ଜା ଆମ୍ବାଆସି ଉଣା କୁଡ଼ି କିତେସି, ଏଞ୍ଜାଣାକି ଉଣା ଆଆତେ □”

ଡିତସ ଅଡ଼େ ତାନି ଆଡ଼ିତାରି

୧୬ ମାହାପୁରୁକି ଜହରା ଆଡ଼େ, ଏଞ୍ଜାସି ମିଙ୍ଗେତାକି ଡିତସ ହିୟାତା ରାହାଁ କିହାଲି ସମାନା ଅଣ୍ପିନି ମନ ହୀତେସି □

୧୭ ଇଚିହଁ ଏଞ୍ଜସି ଖାରଇ ମା ବାତିମାଲିତାଣି ଅପିତେସି, ଏଦି ଆଏ, ସାମା ଏଞ୍ଜସି ତାନୁଏ ହାରେକା ରାହାଁ ଆହାଁ ମୀ ତାଣା ଖାହାଲି ଏଞ୍ଜସି ମନ କିହିମାନେସି □

୧୮ ଏଞ୍ଜାଣିତଲେ ମାମ୍ମୁ ଅର ତାୟିଇଁ ପାଣ୍ଡିମାଞ୍ଜାନମି; ଏଞ୍ଜସି ନେହଁ କାରୁ ଖେକ୍ନି କାମାତାକି ତାନି ଗାଞ୍ଜୁରମି ବାରେ କ୍ରୀସ୍ତାନା କୁଲମିତା ଖେଙ୍ଗାମାନେ,

୧୯ ଖାରଇ ଏଦି ଆଏ, ସାମା ଏଞ୍ଜସି ଜିକେଏ ମା ସେବା ତଲେ ଆହିମାନି ଇ କାମାମେହ୍ନି କାମା ତଲେ ପ୍ରବୁତି ଗାଞ୍ଜୁରମି ଇଞ୍ଜା ରାହାଁ ଅଣ୍ପୁ ତାକି ମା ତଲେ ତାକିନାସି ଆହାଲିତାକି କୁଲମିକା ତଲେ ଆର୍ଝି ଆହାମାନେସି □

୨୦ ମା ତଲେ କିହିମାନି ଇ ସେବା କାମା ଲେହେଁ ହାରେକା ଦାନାତି କାତାତା ଆମ୍ବାଆସି ଏନିକିହଁ ମାଙ୍ଗେ ଦହ୍ ଦସ୍ତାଆପେସି, ଏଦାଆଁତାକି ଜାଗ୍ରାତା ଆହିମାନମି;

୨୧ ଇଚିହଁ ଖାରଇ ପ୍ରବୁ କାନୁତାକି ଆଏ, ସାମା ଲକୁ କାନୁତାକି ଜିକେଏ ଏନାୟି ନେହାୟି, ଏଦାଆଁ ବାରେ କିହାଲି ଅଣ୍ପିମାନମି □

୨୨ ଅଡେ, ମାମ୍ମୁ ମା ଅର ତାୟିଇଁ ଜିକେଏ ଏଞ୍ଜାରିତଲେ ପାଣ୍ଡିମାଞ୍ଜାନମି, ଏଞ୍ଜାଣିଇଁ ମାମ୍ମୁ ହାରେକା କାତାତା ହାରେକା ଦେବା ତାୟିପାରି କିହାଁ ରାହାଁତଲେ କାମାକିନାସି ଇଞ୍ଜା ନେହଁକଁ ପୁଞ୍ଜାମାନମି, ଇଞ୍ଜା ମୀ ତାଣା ଆର୍ଝା ନାମୁ କିହାଁ ମାନାକି ଏଞ୍ଜସି ନୀଏଁ ହାରେକା ରାହାଁ ଆହାମାନେସି □

୨୩ ତିତସ କାତା ଆମ୍ବାଆସି ଖେଞ୍ଜାତିହଁ, ଏଞ୍ଜସି ନା ଆର୍ଝିତାସି ଇଞ୍ଜା ମୀ ତାକି ନା ତଲେ କାମାକିନାସି; ଇଞ୍ଜା ମା ତାୟିୟାଁ କାତା ଖେଞ୍ଜାତିହଁ, ଏଞ୍ଜାରି କୁଲମିକା ତାଣାଟି ପାଣ୍ଡି ଆହାମାନାରି, ଅଡେ କ୍ରୀସ୍ତୁତି ଗାଞ୍ଜୁରମି ଖେଙ୍ଗି କିହି ମାନାରି □

୨୪ ଇଚିହଁ ମୀ ଜୀଞ୍ଜୁନନାୟି ଇଞ୍ଜା ମୀ କାତାତା ମା ବଡପଣତି ପାର୍ମାଣା କୁଲମିକା ନକିତା ଏଞ୍ଜାରାକି ତହ୍ବୁ □



ହାକିଗାଟି କ୍ରୀସ୍ତାନା ଲକୁଣି ସାରେୟି

୧ ଜୀହ୍ୱାଦାତା ମାନି ମାହାପୁରୁ ଲକ୍ଷ୍ମୀଙ୍କୁ ସାୟେମି କିନି କାତା ଅଡ଼େ ମିଙ୍ଗେ ରାଡ଼ାଲି ଲଡ଼ା ଆଏ;

୨ ନାନୁ ପୁଞ୍ଜାମାଲ୍ ମୀରୁ ବାରେବେଲା ସାୟେମି କିହାଲି ତିୟାରା ଆହାମାଞ୍ଜେରି ଇଞ୍ଜା ମାକିଦନିୟାତି ଲକ୍ଷ୍ମୀ ତାଣା ମୀ ତାକି ନାନୁ ବଡ଼ପଣ ଆହିମାଲ୍ □ ନାନୁ ଖେସାମାଚେଏ, “ଆକାୟାତି ତାୟିୟା ସାୟେମି କିହାଲି ହାତି ବାସୀତିଏ ତିୟାରା ଆହାମାନେରି □” ମୀରୁ ଏଲେକ୍ ସାୟେମି କିନାୟି ଏଞ୍ଜାରି ବିତ୍ରାଟି ହାରେକା ଲକ୍ଷ୍ମୀ ଜାଗ୍ରାତା କିହାମାନେ □

୩ ଆଡ଼ିଜିକେଏ ନାନୁ ତାୟିୟାଲ୍ ପାଣ୍ଡିମାଞ୍ଜାଲ୍, ମୀ ତାକି ବଡ଼ପଣ ତହୁନାୟି ଏନିକ୍ ଉଜେଏ ଆଏ, ସାମା ନା କାତାଲେହେ ହାହାଲିତାକି ଜାଗ୍ରାତା ଆଦୁ,

୪ ଏଚେତା ଆପେ ନା ତଲେ ଆମିନି ଲକ୍ଷ୍ମୀ ପାଚେ ମାକିଦନିୟାତି ଖାହାଁ ମୀ ଦାନା କୃତି କିହା ହିଲାଆ ଗାଟାଣି ମେସିହ୍ ମୀରୁ ପାଣ୍ଡିନି ଲାଜା ପିସାନା ମାମ୍ପୁଇ ଆଟ୍ଝା ନାମୁତି କାତାତାକି ଲାଜା ବେଟାଆନିମି

୫ ମୀରୁ ତଲିଏ ଆଞ୍ଜାମାତି ଦାନା ଏନିକ୍ ଗୁରୁମୁରୁ ଆହ୍ ହୀନାୟି ଆଆନା ଜାହାରା ଅଣ୍ପୁ ତଲେ ଆନେ, ଏଦାଆଁତାକି ତଲିଏ ଏ ଦାନା କୃତିକିହାଲି ତିୟାରା କିହାଲି ନଡ଼କଏ ମୀ ତାଣା ହାଜାଲିତାକି ନାନୁ ଏ ତାୟିୟାଣି ବାଡ଼ିମାଲ୍ଲାଲି ଅଣ୍ପାମାଚେଏ □

୬ ସାମା ଇ କାତା ସାତା, ଆମ୍ବାଆସି ରଚାଣି ବିଚା ମାଟିନେସି, ଏଞ୍ଜାସି ଇଚାଣି ତାସା ବେଟା ଆନେସି; ଅଡ଼େ ଆମ୍ବାଆସି ଗାଡ଼ି ବିଚା ମାଟିନେସି, ଏଞ୍ଜାସି ଗାଡ଼ି ତାସା ବେଟାଆନେସି □

୭ ବାରେଜାଣା ଜାହାରା ହିୟାଁ ଏନିକ୍ ଅଣ୍ପା ମାନେ, ଏଲେକ୍ କିପେରି, ମୁସ୍ତି କି ବାଲାମାତମି ତଲେ ଆଏ; ଏଦାଆଁତାକି ଇତିହ୍ ମାହାପୁରୁ ଜାହାରା ଅଣ୍ପୁ ତଲେ ଦାନାହାନି ଲକ୍ଷ୍ମୀ ଜୀଝୁ ନନେସି □

୮ ଅଡ଼େ, ବାରେ ଦିଶ୍ପୁ ବାରେବେଲା ହାରେପୁରେ ବେଟାଆହାଁ ମୀରୁ ଏନିକ୍ ବାରେ ନେହ୍ କାମାତାକି ହାରେକା ଇଞ୍ଜା ହାରେକା ଦାନା କିହାଲି ଆଡ଼ିଦେରି, ଏଦାଆଁତାକି ମାହାପୁରୁ ମିଙ୍ଗେ ବାରେଲେହେତି କାର୍ମା ହାରେପୁରେ ହାହାଲି ଆଡ଼ାନେସି □

୯ ଦାର୍ମ୍ୟପତିତା ରାସ୍ତାକି ଆହାମାନେ,
 “ଏଞ୍ଜାସି କେୟୁ ଦେତାନା ଦାନା ହୀହାମାନେସି,
 ଏଞ୍ଜାସି ହିଲାଆ ଗାଟାରାକି ହାରେପୁରେ ହୀହାମାନେସି; ଏଞ୍ଜାସି
 ଦାର୍ମ୍ୟ ଏରେଲାଞ୍ଜା ରାଏ □”

୧୦ ମାହାପୁରୁ ମାଟିନାଣାକି ବିଚା ଅଡ଼େ ତିଞ୍ଜାଲି ରାନ୍ଦା ହୀନେସି,
 ଏଞ୍ଜାସି ମାଟାଲିତାକି ମିଙ୍ଗେ ବିଚା ହିୟାନେସି ଇଞ୍ଜା ଏଦାଆଁ
 ପାଡ଼ିକିନେସି, ଅଡ଼େ ମୀ ଦାର୍ମ୍ୟତି ପାଡ଼େୟି ଗାତି କିନେସି □

୧୧ ଏଲେକ୍ ମୀରୁ ବାରେ ଦିଶ୍‌ସୁତା ବାଡ଼କାନା ଜାହାରା ଅଶ୍‌ପୁ
 ତଲେ ଦାନା କିହାଲି ଆଡ଼ିଦେରି, ଇଞ୍ଜା ଏଡ଼ି ମା ତାଣାଟି ମାହାପୁରୁଇ
 ଜହରା କିନାୟି ଆଡ଼େନ □

୧୨ ଇଚିହ୍ ଇ ଦାନା ହୀନି ସେବା କାମା ମାହାପୁରୁ ଲକୁତି
 ଲଡ଼ାମାନାଣି ପୁରା କିହିମାନେ, ଏଡ଼ି ଆଏ, ସାମା ଏଦାଆଁ ତଲେ
 ଜିକେଏ ମାହାପୁରୁତି କାମାତା ହାରେକା ଲକୁ ରାହାଁତଲେ ଜହରା
 କିହିମାନେରି □

୧୩ ଇଚିହ୍ ଇ ସେବା କାମାତି ପାରମାଣା ତାକି ଲକୁ ମିଙ୍ଗେ
 ଆବିମାଞ୍ଜାନି କ୍ରୀସ୍ତତି ନେହ୍ କାବୁତି ନାମୁ, ଇଞ୍ଜା ମାହାପୁରୁତି ଲକୁ
 ଅଡ଼େ ବାରେତାକି ମୀ ଆଣ୍ଡିନାୟି ତୀରପୁ ତାକି ମାହାପୁରୁତି ଗାଞ୍ଜୁରମି
 କିହିମାନେରି □

୧୪ ମିଙ୍ଗେ ମାହାପୁରୁତି ହାରେପୁରେ କାର୍ମାମେହ୍‌ନାଣି ତାକି ଏଞ୍ଜାରି
 ଜିକେଏ ହାରେକା ରାହାଁତଲେ ପ୍ରାତାନାତା ମିଙ୍ଗେ ଅଶ୍‌ପିମାଞ୍ଜାନେରି
 □

୧୫ ମାହାପୁରୁତି ହାରେପୁରେ ଦାନା ତାକି ତାଙ୍ଗେ ଜହରା ଆଡ଼େ □

୧୦

ପାଞ୍ଜୁଲ ତାନି ସେବା କାମାତାକି ଖେଣ୍ଡେଖେହ୍‌ନାୟି

୧ ନାନୁ ପାଞ୍ଜୁଲତେଏଁ ମୀ ନକିତା ସାପି ଆହା ମାନାତେଏଁ ସାମା
 ହେକ ମାନାଟି ବାଡ଼ୁୟୁ ତହ୍‌ନାତେଏଁ, ନାନୁଏ କ୍ରୀସ୍ତତି ସୁତୁଗାଟି
 ଅଶ୍‌ପୁ ତଲେ ମିଙ୍ଗେ ବାଡ଼ିମାଲିହ୍ ରାସିମାଞ୍ଜାଇଁ,

୨ ହାଅ ନାନୁ ପ୍ରାତାନା କିହିମାଇଁ, ମାର ମାଣ୍ଠିତି ଅଣ୍ଠପୁ ତଲେ ତାକିମାନାୟି ଇଞ୍ଜି ଅଣ୍ଠପିମାନାରି କପାଟି ବାଡ଼ୁୟୁ ତସାଲି ଅଣ୍ଠପାମାଇଁ, ଇଞ୍ଜା ନାନୁ ଖାଡ଼ିସାରେ ଏଲେତି ବାଡ଼ୁୟୁ ତସାଲି ଆଏ;

୩ ମାର ଇ ଦାରତିତା ଆଙ୍ଗା ତଲେ ନୀତାମାନାୟି ସାତା, ସାମା ମାର ଦାରତିତି ଅଣ୍ଠପୁ ତଲେ ଜୁଜୁ କିହି ହିଲୀଆୟି,

୪ ଇତିହିଁ ମା ଜୁଜୁତି ସାଜୁ ଆଙ୍ଗାତି ଜୁତି ତଲେ ଆଏ, ସାମା କାଜା କଟା ଇଲୁ ମେକ୍‌ହାଲି ମାହାପୁରୁ ନକିତା ଏ ବାରେ ବାଡ଼ୁୟୁ ଆନେ;

୫ ମାମ୍‌ମୁଟି ଅଣ୍ଠପୁ କାତା ବାରେ ଅଡେ ମାହାପୁରୁତି ବୁଦି କପାଟି ନିଜିନି ବଡପଣ ତହୁନି କାଜା କାତାତି ବାରେ ମେକ୍‌ନମି; ଅଡେ ବାରେଲେହେତି ଅଣ୍ଠପିନାଣି ଆସାନା କ୍ରୀସ୍ତତି ମାନି ଆୟାଲି ଦସ୍‌ପି କିହିମାନମି □

୬ ଏତିବେଲା ମାରୁ ବାରେ ଖାକିଟି ମାନୁଞ୍ଜି ଆଦେରି, ଏତିବେଲା ମାମ୍‌ମୁନୁଞ୍ଜି ଆଆଗାଟାଣି ବାରେ ଡଣ୍ଡ ହାନମି □

୭ ମାରୁ ସାରିସୁରୁ ପାଙ୍ଗାତା ତଞ୍ଜା ଆହିମାନାଣି ମେସିମାଞ୍ଜେରି □ ଆମ୍‌ଆସି ଜାହାରାଇଁ କ୍ରୀସ୍ତତି ଲକୁଡେଏଁ ଇଞ୍ଜି ନାମିନେସି, ଆତିହିଁ ଏଞ୍ଜିସି ଏନିକ୍ କ୍ରୀସ୍ତତି ଲକୁ, ମାମ୍‌ଜିକେଏ ଏଲେକ୍ କ୍ରୀସ୍ତତି ଲକୁ, ଇଦାଆଁ ତାନୁଏ ଅଣ୍ଠପାପେସି □

୮ ଇତିହିଁ ମା ଅଦିକାରା ତାକି ନାନୁ ଅଲ୍‌ପ ଗାଡି ବଡପଣ ତସି ଜିକେଏ ଲାଜା ଆଅଁ; ମିଙ୍ଗେ ନାସଡି କିହାଲି ପ୍ରବୁ ମାଙ୍ଗେ ଅଦିକାରା ହୀଆନା ମିଙ୍ଗେ ତିୟାରା କିହାଲି ହୀହାମାଞ୍ଜାନେସି □

୯ ନା ରାଡିତି ଆକୁୟାଁ ତଲେ ନାନୁ ମିଙ୍ଗେ ଆଜିକିହି ମାଞ୍ଜାନେସି ଇଞ୍ଜି ଅଣ୍ଠପାଆଦୁ □

୧୦ “ଏଚରଜାଣା ଏଲେଇନେରି, ପାଞ୍ଜୁଲ ତାନି ଆକୁ ରାଡିନାଟି ଅଦିକାରା ଅଡେ କାଜା ବାଡ଼ୁୟୁ ଗାଟାଇ, ସାମା ମା ତଲେ ଆଙ୍ଗାତା ମାନାଟି ଏଞ୍ଜିସି ବାଡ଼ୁୟୁ ହିଲୀଆଗାଟାସି ଅଡେ ତାନି କାତା ବାରେ ଉଜେଏତାୟି □”

୧୧ ମାମ୍‌ହେକ ମାଞ୍ଜାନା ଆକୁତା ରାଡିନି କାତା ଏନିଲେହେତିୟାୟି, ମୀ ତଲେ ମାଞ୍ଜାନା କିନି କାମା ଜିକେଏ ଏଲେତାୟିଏ ଇଞ୍ଜି ଲକୁ ଅଣ୍ଠପାପେରି □

୧୨ ଇଚିହଁ ଆମ୍ବାଆରି ଜାହାରାଇଁ ବତପଣ ତସା କଡିନେରି, ଏଞ୍ଜାରି ତଲେ ମାଙ୍ଗେ ଲେକା କିହାଲି ଜିକେଏ ମା ସାସା ହିଲେଏ; ସାମା ଏଞ୍ଜାରି ତାମ୍ବୁତାମି ତାଣାଟି ଜାହାରାଇଁ ଲେକା କିହାନା ବୁଦି ହିଲାଆଗାଟାରି ତଞ୍ଜା ଆଡେରି □

୧୩ ସାମା ମାମ୍ବୁ ହାନ୍ଦି ଗାଣ୍ଡା ହାଜାନା ବତପଣ ତହୁଅମି; ମୀରୁ ଜିକେଏ ମାହାପୁରୁ ମାଙ୍ଗେ ହେର୍ପା ମାଞ୍ଜାନି କାମାତି ହାନ୍ଦି ବିତ୍ରା ତାତେରି, ଏ ଲେକା ତଲେ ବତପଣ କିଦେରି □

୧୪ ଇଚିହଁ ମୀରୁ ମା ହାନ୍ଦି ବିତ୍ରା ହିଲାଆତି ଲେହେଁ ମାମ୍ବୁ ହାନ୍ଦି ଗାଣ୍ଡା ମାନମି, ଏଦି ଆଏ; ଏନିଇଚିହଁ କ୍ରୀସ୍ତତି ନେହଁ କାରୁ ଝେକ୍‌ହିହଁ ମାମ୍ବୁ ମୀ ତାଣା ଜିକେଏ ତଲିଏ ଝାହାମାତମି;

୧୫ ମାହାପୁରୁ କିହାମାନି ମା କାମାତି ପାଙ୍ଗାତା ଏଟକା ଲକୁତି କାମାତା ବତପଣ କିହିହିଲଅମି, ସାମା ମାମ୍ବୁ ଆସା କିହିମାନମି ମୀରୁ ନାମ୍ବୁତା ପାତା ଆନାଣିତଲେ ମୀ ତାଣାଟି ମା କାମା ଅଡେ ହାରେକା ପାତା ଆଡେନ □

୧୬ ମାମ୍ବୁ ଅର ରଅଣି ହାନ୍ଦି ବିତ୍ରା ଏଞ୍ଜାସି ତଲିଏ କିହାମାନି କାମାତାକି ବତପଣ ତହୁଆନା, ମାମ୍ବୁ ମୀ ତାଣାଟି ଅର ଦେସାତା ହାଜାନା ନେହଁ କାରୁ ଝେକ୍‌ହାଲି ଆଡିନମି ଇଞ୍ଜଁ ଆସା କିହିମାନମି □

୧୭ ସାମା ଦାମ୍ବୁପତିତା ରାସ୍‌କି ଆହାମାନେ, “ବତପଣ ତହୁନାସି ପ୍ରବୁ କିତି କାମାତାକି ବତପଣ ତସ୍‌ପେସି □”

୧୮ ଜାହାରାଇଁ ନେହାଁତେଏଁ ଇଞ୍ଜଁ ଅଣ୍‌ପିନାସି ଏଞ୍ଜାସି ତାୟିପାରିତା ଜୀଣା ଆଡାସି ଆଏ, ସାମା ପ୍ରବୁ ଆମ୍ବାଆରାଇଁ ସାତା ନେହାଁସି ଇଞ୍ଜଁ ଇନେସି ଏଞ୍ଜାସି ତାୟିପାରିତା ଜୀଣା ଆଡାସି □

୧୧

ପାଞ୍ଜୁଲ ଅଡେ ନିଚି ଜାପ୍‌ନାରି

୧ ନାମ୍ବୁ ବୁଦି ହିଲାଆ ଗାଟାତେଏଁ ଲେହେଁ ଇତେକା ଝେସାଲି ନାଙ୍ଗେ ହେଲ ହିୟାତିହଁ ନେହେଁ ଇଞ୍ଜଁ ଅଣ୍‌ପିମାଇଁ, ମୀରୁ ନାଙ୍ଗେ ହେଲ ହିୟାଦେରି □

୨ ମାହାପୁରୁ ତାକି ହାରେକା ରାହାଁତା ନାନୁ ମିଙ୍ଗେତାକି ହାରେକା ରାହାଁ, ଇଚିହୁଁ ନାନୁ ମିଙ୍ଗେ ସୁଦୁ ଡାଆ ମାଙ୍ଗାଲେହେଁ ର.ଡକ୍ରା ତାଣା ଇଚିହୁଁ କ୍ରୀସୁଇଁ ବୀହା ଆୟାଲି କାତା ହୀହାମାଇଁ □

୩ ସାମା ରାରୁ ତାନି ସୁଡୁମି ତଲେ ହବାଇଁ ନାଡ଼ି କିଡେ, ଏଲେକିହୁଁ ଏଡେତା ଆପେ ମୀ ମନ କ୍ରୀସୁ ତାଣା ମାନି ତୀରପୁତାୟି ଇଞ୍ଜା ସୁଦୁତା ମାନାୟି ନାସା ଆନେ, ଇଦାଆଁ ନାଙ୍ଗେ ଆଜି ହଚିମାଞ୍ଜାନେ □

୪ ଇଚିହୁଁ ଆମିନି ଜୀସୁଇଁ ମାମ୍ବୁ ଝେକ୍‌ଆତମି, ଇଲେକିହୁଁ ଏଟକା ଜୀସୁଇଁ ଆମ୍ବାଆସି ଆପେ ଖାହାଁ ଝେକ୍‌ନେସି, କି ଆମିନି ସୁଦୁଜୀଝୁ ମୀରୁ ବେଟାଆଆଡେରି, ଇଲେକ୍‌ ଏଟକାତି ର. ସୁଦୁଜୀଝୁ ବେଟାଆଡେରି, କି ଆମିନି ନେହୁଁ ବଲୁ ମୀରୁ ଆବାଆଡେରି, ଇଲେକ୍‌ ଏଟକାତି ର. ନେହୁଁ ବଲୁ ବେଟାଆଡେରି, ଏଲେଆଡ଼ିହୁଁ ମୀରୁ ଗାଡ଼ି ଅରୁହିନାଡେରି □

୫ ଇଚିହୁଁ ଏ କାଜାପାଣା ଗାଟି “ପାଣ୍ଡୁଝି ଆଡ଼ାରି” ତାଣାଟି ନାନୁ ଏନିକିହୁଁ ଜିକେଏ ଉଣା ତାଡେଏଁ ଆଏ ଇଞ୍ଜୁଁ ଅଣ୍ଡିମାଇଁ □

୬ ସାମା ନାନୁ କାତା ଜଲ୍ଲାଲି ପୁନାଆତି ଜିକେଏ ବୁଦିତା ଉଣାଡେଏଁ ଆଏ; ସାତାତଲେ ମାମ୍ବୁ ରୁରେଲେହେଁତି ବାରେ କାତାତା ମିଙ୍ଗେତାକି ଇଦାଆଁ ଝେସ୍‌ଆତମି □

୭ ମୀରୁ ଏନିକ୍‌ କାଜାଡେରି ଆଡେରି, ଏଦାଆଁତାକି ନାନୁ ଜାହାରାଇଁ ଉଣା କିହାକତାନା ମୀ ତାଣା ଉଜେଏନେଏ ମାହାପୁରୁତି ନେହୁଁ କାରୁ ଝେକ୍‌ହାଡେଏଁ; ଏଲେକିୟାଲିଏ ନାନୁ ଏନି ପାପୁ କିଡେଏଁ □

୮ ମୀ ତାଣା କାମା କିହୁଁ ମିଙ୍ଗେ ସେବା କିୟାଲି ଏଟକା କୁଲମିଟି ବର୍ତନ ବେଟାଆହାଁ ଏଞ୍ଜାରି ତାଣାଟି ମୀଞ୍ଜା ଅହିମାଚେଏଁ □

୯ ମୀ ତାଣା ମାଟିବେଲ୍ଲା ନାଙ୍ଗେ ଏନାଆଁ ହିଲାଆତି ଜିକେଏ ଆମ୍ବାଆରାକି ବାଦା ହୀହାହିଲଅଁ; ମାକିଦନିୟାଟି ଖାଡ଼ି ତାୟିୟା ନାଙ୍ଗେ ଲଡ଼ା ଆନାଣି ବାରେ ହିୟାଡେରି, ମିଙ୍ଗେ ବଲୁ ହୀଆରେଟୁ ନାନୁ ଜାଗ୍ରାତା ଆହାମାଚେଏଁ, ଅଡେ ଜାଗ୍ରାତା ଆହାଁ ଡ଼ୟିଇଁ □

୧୦ ନା.ତାଣା ମାନି କ୍ରୀସୁତି ସାତାଇଁ ସାକି ଇଗାନା ଝେସିମାଇଁ, ଆକାୟା ଗାଡ଼ାୟାତି ନା.ଇ ବଡପଣତି ଆମ୍ବାଆସି ଜିକେଏ ସାପି

କିହାଲି ଆଡ଼ଅରି ଏନାଆଁକି ?

୧୧ ନାନୁ ମିଙ୍ଗେ ଜୀଝୁନହୁଁ ମାଞ୍ଜାଆକି କି ? ମାହାପୁରୁ ପୁଞ୍ଜାମାନେସି ନାନୁ ମିଙ୍ଗେ ଜୀଝୁ ନହୁଁ ମାଞ୍ଜାଇଁ □

୧୨ ସାମା ବଡ଼ପଣ ଆନିତାଣା ମା ଲେହେଁ ତଞ୍ଜାଆହାଲି ଆମିନି “ଉଜେଏତି ପାଣ୍ଡୁଆଡ଼ାରି” ପାରୁ ପାରିମାନେରି ନାନୁ ଏନିକିଁ ଏଞ୍ଜାରାକି ପାରୁ ହାଅଁ, ଇଦାଆଁତାକି ନାନୁ ଏନାଆଁ କିହିମାଇଁ, ଏଦାଆଁ କିହିମାଇଁ □

୧୩ ଇଚିହୁଁ ଏଲେତି ଲକୁ ନାଡ଼ିକିନି ପାଣ୍ଡୁ ଆଡ଼ାରି, ଇଞ୍ଜା ଖାଣା ବାଦଲଞ୍ଜିକିହାଁ କାମାକିନାରି, ଏଞ୍ଜାରି କ୍ରୀସ୍ତତି ପାଣ୍ଡୁ ଆଡ଼ାରି ଖାଣା ଆହନେରି □

୧୪ ଇଚିହୁଁ ଏଦି କାବାଆନି କାତା ଆଏ, ଇଚିହୁଁ ସୟତାନ ତାନୁଏ ଉଜେଡ଼ିତି ଦୂତୁତି ଖାଣା ଆହନେ □

୧୫ ଏରେଟିଏ ତାନି ହଲିୟାଙ୍ଗା ଜିକେଏ ଦାମ୍ବୁଗାଗାରି ଖାଣା ଆହନେରି, ଆତିହୁଁ ଏଦି କାଜା କାତା ଆଏ; ରାନ୍ତି ଦିନାତା ଏଞ୍ଜାରି ତାନି କିତି କାମା ତଲେ ତଣ୍ଡୁ ବେଟାଆନେରି □

ପାଣ୍ଡୁଆଡ଼ି ପାଣା ତାକି ପାଝୁଲ କସ୍ତ ବେଟାଆନାୟି

୧୬ ନାନୁ ଅଡ଼େ ଝେସିମାଞ୍ଜାଇଁ, ଆମ୍ବାଆସି ନାଙ୍ଗେ ବୁଦି ହିଲାଆଗାଟାସି ଇଞ୍ଜୁଁ ଅଣ୍ଡାଆପେସି; ସାମା ମୀରୁ ଏଲେକିଁ ଅଣ୍ଡାପଦେରି, ଆଡ଼ିଜିକେଏ ବୁଦିହିଲାଆଗାଟାସି ଲେହେଁ ନାଙ୍ଗେ ଆବାଦୁ, ଏନିଇଚିହୁଁ ନାନୁ ଜିକେଏ ଅଲ୍ପ ବଡ଼ପଣ ତସାଲି ଆଡ଼ିଇଁ □

୧୭ ନୀଏଁ ନାନୁ ଏନାଆଁ ଝେସିମାଇଁ ପ୍ରବୁତି ଅଣ୍ଡାପୁ ତଲେ ଝେସିମାଞ୍ଜାଅଁ, ସାମା ବୁଦି ହିଲାଆ ଗାଟାତେଏଁ ଲେହେଁ ହାରେକା ସାସାତଲେ ବଡ଼ପଣ ତସାନା ଝେସିମାଞ୍ଜାଇଁ □

୧୮ ହାରେକା ଲକୁ ଦାର୍ଡିତି ଲେହେଁ ବଡ଼ପଣ ଆହିମାନାକି ନାନୁ ଜିକେଏ ବଡ଼ପଣ ତହୁଁଇଁ □

୧୯ ଇଚିହୁଁ ମୀରୁ ହାରେକା ବୁଦି ଗାଟାତେରି ଇଞ୍ଜିହୁଁ, ରାହାଁ ତଲେ ବୁଦି ହିଲାଆଗାଟାରାଇଁ ଅରୁହି ମାଞ୍ଜେରି □

୨୦ ଆତ୍ମାଆସି ମିଙ୍ଗେ ହଲିୟାଙ୍ଗା କିହାନା ଇଟାନେସି, ମୀ ଦନ ମୀଞ୍ଜା ଅୟାନେସି; ମିଙ୍ଗେ ପାନ୍ଦାତା ମେଡ଼ହାଁ ଆସ୍ତାନେସି, ତାହାରା ଆୟାନେସି କି ମୀ ଗେଏଲୀତା ସାପ୍ତା ଝେଡାନେସି ଏ ବାରେ ଅରୁହି ମାଞ୍ଜେରି □

୨୧ ନାନୁ ଲାଜାତଲେ ଝେସିମାଞ୍ଜାଇଁ, ମାର ବାଡ଼ୟୁ ହିଲାଆ ଗାଟାତାୟି ଆହାମାନାୟି □ ଆଡ଼ି ଜିକେଏ ଏନି କାତାତା ଆତ୍ମାଆସି ସାସା ଗାଟାସି, (ନାନୁ ବୁଦି ହିଲାଆନା ଝେସିମାଞ୍ଜାଇଁ) ନାନୁ ଜିକେଏ ସାସା ଗାଟାତେଏଁ □

୨୨ ଏଞ୍ଜାରି କି ଏବୁ ଲକୁ ? ଇଚିହିଁ ନାନୁ ଜିକେଏ ଏବୁ ଲକୁତେଏଁ □ ଏଞ୍ଜାରି ଇସ୍ତାୟେଲ ଲକୁ ? ଇଚିହିଁ ନାନୁ ଜିକେଏ ଇସ୍ତାୟେଲ ଲକୁତେଏଁ □ ଏଞ୍ଜାରି ଅବ୍ରାହାମତି କୁଡ଼ାତାରି ? ଇଚିହିଁ ନାନୁ ଜିକେଏ ଅବ୍ରାହାମ କୁଡ଼ାତାତେଏଁ □

୨୩ ☆ଏଞ୍ଜାରି କି କ୍ରୀସ୍ତତି ସେବା କିନାରି ? ଇଚିହିଁ; (ନାନୁ ବାୟା ଆଡ଼ିଲେହେଁ ଏଲେଇଞ୍ଜିମାଇଁ), ନାନୁ ଏଞ୍ଜାରି କିହାଁ ଆଗାଡ଼ା ନେହେଁ ସେବା କିନାତେଏଁ, ନାନୁ ଏଞ୍ଜାରି କିହାଁ ଗାଡ଼ି ଖାହୁ କାମା କିହାମାଇଁ, ହାରେକା କାୟିଦି ଇଲୁତା ମାଚେଏଁ, ହାରେକା ଇରନି ମାଡ଼ା ବେଟାଆହା ମାଚେଏଁ, ଅଲେ ଅଲେ ହାକିତା ହେରୁଖା ମାଚେଏଁ □

୨୪ ନାନୁ ଜୀହୁଦି ଲକୁ ତାଣାଟି ପାସା ଦେବା ତୀରିସି ନ ଗଟା ବେତି ବାଡ଼ଗା ମାଡ଼ା ବେଟାଆହାମାଇଁ;

୨୫ ରମ୍ପତି ଲକୁ ତାଣାଟି ତୀନି ପାଲି ସାଟୁଣି ତ:ରିତଲେ ନାଙ୍ଗେ ଇରହାତେରି, ର ପାଲି ନାଙ୍ଗେ ଖାଲକାତଲେ ଇରହାତେରି, ତୀନି ପାଲି ଜାଜା ତୀତି ତାଣାଟି ଗେଲୁହା ମାଇଁ, ର ଲାଆଁ ର ମାଦେନା ସାମ୍ବୁରିତି ଏୟୁତା ମୁଞ୍ଜା ମାଚେଏଁ,

୨୬ ☆ନାନୁ ହାରେକା ଦେବା ଜିରୁ ତାକିନାଟି, କାତା ଆଜିନିତାଣା, ସରକା ତାଣାଟି, ନା କୁଡ଼ାତି ଜୀହୁଦି ଲକୁ ତାଣାଟି, ଏଟକା କୁଡ଼ାତି ଲକୁ ତାଣାଟି, କାଜା ନାସ୍କାତି ଆଜିଟି, ଲକୁ ହିଲାଆ ଜାଡ଼ାଟି, କାଜା ସାମ୍ବୁରି ଆଜିଟି, ଅଡ଼େ ନାଡ଼ିକିନି ତଣେସିଙ୍ଗା ଆଜିଟି □

୨୭ ନାନୁ ହାରେକା କାମା କିହାନା କସ୍ତ ବେଟାଆହାମାଇଁ, ଏଚର ପାଲି ଲାଆଁୟାଁ ଇଦା କିଆନା ହାକି ଅଡ଼େ ଏସ୍ତକିଟି ମାଚେଏଁ, ଏଚର ପାଲି ଉପାସା ତଲେ, ପେନି ଇଞ୍ଜା ନାଗ୍ଡାଟି ମାଚେଏଁ □

୨୮ ଏଲେତି ବାରେ ବାଦା ପିସ୍ପେ ନାଙ୍ଗେ ଅଡ଼େ ର କାଜା ବଜୁମାନେ, ଇଚିହ୍ମ ବାରେଦିନା କୁଲମିକା ତାକି ନାନୁ ଅଣ୍ଡପିମାଇଁ □

୨୯ ଆମ୍ବାଆସି ବାଡ଼ୁୟୁ ହିଲାଆଗାଗାସି ଆଡ଼ିସାରେ ନାନୁ ଜିକେଏ ବାଡ଼ୁୟୁ ହିଲାଆ ଗାଗାଚେଏଁ ଆଏକି ? ଆମ୍ବାଆସି ପାପୁ କିତିହ୍ମ ନାନୁ ହିୟାତା ଦୁକୁ ଆଅଁ କି ?

୩୦ ନା ବତପଣ ତସାଲି ଲଡ଼ା ଆଡ଼ିହ୍ମ, ନାନୁ ନା ଆଡ଼ାଆଗାଗାଣି ତାକି ବତପଣ ତହ୍ଲୁଇଁ □

୩୧ ନାନୁ ମିଚି ଜଲି ହିଲଅଁ, ଏଦାଆଁ ପ୍ରୁ ଜୀସୁ କ୍ରୀସ୍ତୁଟି ମାହାପୁରୁ ଅଡ଼େ ଆବା ପୁଞ୍ଜାମାନେସି; ଏଞ୍ଜାସି କାଲାକାଲା ତାକି ଜହରା □

୩୨ ☆ଦମେସକତା ହାରେତା ରାଜାତି ସାଲୁଞ୍ଜି କିନାସି ନାଙ୍ଗେ ଆସାଲି ଏ ଗାଡ଼ାତି ତାନି କାପୁ କାଝିନି କସ୍ତକାଣି ପାଣ୍ଡାମା କାପି କିହିମାଚେସି □

୩୩ ଇଞ୍ଜା ର ତାଲିତା କିଡ଼କିତି କାତି ଲାକଟି ନାଙ୍ଗେ ରେପ୍‌ହାଲିଏ ନାନୁ ଏଞ୍ଜାଣି କେୟୁଟି ଗେଲ୍‌ପିଆଡ଼େଏଁ □

୧୨

ପାଞ୍ଜୁଲ ତଞ୍ଜାଆନାଣି ମେହ୍‌ନାୟି

୧ ବତପଣ କିନାୟି ନେହାୟି ଆଆତି ଜିକେଏ ନାଙ୍ଗେ ବତପଣ କିନାୟିମାନେ, ନାନୁ ପ୍ରୁଟି ମେହ୍‌ନାଣି ଅଡ଼େ ତଞ୍ଜାଆନାଣି ମିଙ୍ଗେ ୱେସ୍ତାଇଁ □

୨ ନାନୁ ର କ୍ରୀସ୍ତାନା ଲକୁଇଁ ପୁଞ୍ଜାମାଇଁ, ଏଞ୍ଜାସି ସଦ ବାର୍ସା ନକେଏ ଲାକପୁରୁତି ତାନି ପୁରୁ ପାତେକା ଅଞ୍ଜିଆଡ଼େସି ଏଞ୍ଜାସି ଆଙ୍ଗା ତଲେ ମାଚେସି କି ଆଙ୍ଗା ହିଲାଆନା ମାଚେସି ନାନୁ ପୁଞ୍ଜାହିଲଅଁ; ମାହାପୁରୁ ପୁଞ୍ଜାମାନେସି □

୩ ହାଅ ନାନୁ ଏଲେତି ର ଲକୁଇଁ ପୁଞ୍ଜାମାଇଁ, ଏଝାସି ପାରାଦିସତା ଅଢ଼ିଆଡେସି ଏଝାସି ଆଙ୍ଗା ତଲେ ମାନେସି କି ଆଙ୍ଗା ହିଲାଆନା ମାରେସି ନାନୁ ପୁଞ୍ଜାହିଲଅଁ; ମାହାପୁରୁ ପୁଞ୍ଜାମାନେସି □

୪ ଏଝାସି ଲାକପୁରୁ ଅଢ଼ିଆଡେସି, ଅଡ଼େ ଇଲେତି ହାଡ଼ା ଝେଚେସି, ଏଦାଆଁ ମାଣସି ଜଲାଲି ଆଡ଼ାଆଗାଗାୟି ଅଡ଼େ ଗୁଡିତା ଅହାଲି ଆଡ଼ାଆଗାଗାୟି □

୫ ଇଲେତି ର ଲକୁତାକି ନାନୁ ବତପଣ କିଇଁ, ସାମା ନା ତାକି ନାନୁ ନା ବାଡ଼ୁୟୁ ହିଲାଆଗାଗାଣି ପିସ୍‌ପେ ଅଡ଼େ ଏଦାଆଁତାକିଞ୍ଜା ବତପଣ କିଅଁ □

୬ ବତପଣ ତସାଲି ଅଣ୍ଡପିତିହଁ ଜିକେଏ, ନାନୁ ବୁଦି ହିଲାଆ ଗାଗାତେଏଁ ଆଅଁ, ଇଚିହଁ ନାନୁ ସାତା କାତା ଝେହ୍‌ଇଁ, ସାମା ଲକୁ ନାଙ୍ଗେ ଏନିକଁ ମେସ୍ତାନେରି ଇଞ୍ଜା ନା ତାଣାଟି ଏନିକଁ କାତା ଝେନେରି, ନାଙ୍ଗେ ତଞ୍ଜା ଆହାମାନି କାତାତା ହାରେକା କାଜାୟି ଆହାମାନାକି ଏନିକଁ ନା କାତାତା ହାରେକା ଅଣ୍ଡପଅସି ଇଞ୍ଜା, ଇଦାଆଁତାକି ନାନୁ ସାପି ଆହାମାଇଁ □

୭ ନାନୁ ଏନିକଁ ଗାଡି ବତପଣ କିଅଁ, ଇଦାଆଁତାକି ନା ଆଙ୍ଗାତା ର ସାସି ହାପକି ଆୟାଡେ, ନାଙ୍ଗେ ସାସି ହାହାଲି ସୟତାନତି ଦୁତୁଇଁ ପାଣ୍ଡୁଆଡେ, ଏନିକଁ ନାନୁ ଗାଡି ବତପଣ ଆଅଁ □

୮ ଏ କସ୍ତୁ ନା ତାଣାଟି ହେକ ଆୟାଲି ତାନି ପାଲି ପ୍ରବୁଇଁ ବାଡିମାଲିହଁ ରାସ୍ତେଏଁ □

୯ ଅଡ଼େ ଏଝାସି ନାଙ୍ଗେ ଏଲେଇଞ୍ଜାନେସି, “ନା କାର୍ମାମେହ୍‌ନାୟି ନିଙ୍ଗେତାକି ହାରେପୁରେ,” ଇଚିହଁ ନୀ ବାଡ଼ୁୟୁ ହିଲାଆତାଣା ନା ବାଡ଼ୁୟୁ ହାରେ ଗାଡିଆହଁ ତଞ୍ଜାଆନେ, ଇଚିହଁ ଏନିକଁ କ୍ରୀସ୍ତତି ବାଡ଼ୁୟୁ ନା ତାଣା ଡୟିନେ, ଏଦାଆଁତାକି ନା ବାଡ଼ୁୟୁ ହିଲାଆ ବେଲାତା ହାରେକା ରାହାଁ ତଲେ ବତପଣ ତହ୍‌ଇଁ □

୧୦ ଏଦାଆଁତାକି କ୍ରୀସ୍ତତି ତାକି ବାଡ଼ୁୟୁ ହିଲାଆଟି, ଲାଜା ପାଣ୍ଡୁନାଟି, ହାକି ବେଲାତା, ସାସି ଝାନି ବେଲା, କସ୍ତୁତା ନାନୁ ରାହାଁଆଇଁ, ଇଚିହଁ ଏଚିବେଲା ବାଡ଼ୁୟୁ ହିଲାଆ ଗାଗାତେଏଁ ଏଚିବେଲା ବାଡ଼ୁୟୁ ଗାଗାତେଏଁ □

କରିବୁ ତାରାକି ପାଞ୍ଚଲ ଅଶ୍ୱପିନାୟି

୧୧ ନାନୁ ବୁଦି ହିଲିଆ ଗାଟାତେଏଁ ଲେହେଁ ଆହାମାଙ୍କ, ମୀରୁ ନାଞ୍ଜେ ଏଲେକିଓ କିୟାତେରି, ମୀରୁ ନାଞ୍ଜେ ନେହାସି ଇଞ୍ଜାନାୟି ମାତେ; ନାନୁ ଏନାତେଏଁ ଆଏ, ଆଡ଼ି ଜିକେଏ ଏ. “କାଜା ପାଶୁଓ ଆହାମାନାରି” କିହାଁ ଉଶାତେଏଁ ଆଏ □

୧୨ ଆମ୍ବାଆସି ହାରେକା ସିନାୟାଁ, କାବାଆନି କାମା, ଅଡ଼େ ବାଡ଼ୁୟିତି କାମା ପାଶୁଓ ଆହାମାନାରି ସିନାୟାଁଲେହେଁ, ଏ ବାରେ ସାତେଏ ମୀ ତାଶା ସାସାତଲେ କିଓଆହାମାନେ □

୧୩ ଇଚିହଁ ନାନୁ ମୀ ବଦୁ ଲେହେଁ ଆହାହିଲଅଁ, ଇ ରଣ୍ଡିଏ କାତା ପିସପେ ଅର କୁଲମିତି ଲକୁ କିହାଁ ମିଙ୍ଗେ ଅଡ଼େ ଏନିକଁ ଉଶା ମେସାମାଞ୍ଜାଙ୍କ, ଏ ନା ଦହ ଆସ୍ତାଆଦୁ □

୧୪ ମେହ୍ନୁ ମୀ ତାଶା ଖାହାଲି ନୀଏଁ ତଲେ ତାନି ପାଲି ତିୟାଋ ଆହିମାଙ୍କ, ଅଡ଼େ ନାନୁ ମିଙ୍ଗେ ଏନି ବଦୁ ହିୟଅଁ, ଇଚିହଁ ନାନୁ ମୀ ଦନ ପାରାଆନା ମିଙ୍ଗେ ପାରିମାଞ୍ଜାଙ୍କ, ମୀରକା ମାସ୍କା ତାନି ଇୟା ଆବାକି କୁଡ଼ିକିଉ ସାମା ଇୟା ଆବା ଦେଁ ତାନି ମୀରକା ମାସ୍କାକି କୁଡ଼ିକିନାୟି ମାନେ □

୧୫ ନାନୁ ମୀ ଜୀଞ୍ଜୁତାକି ହାରେକା ରାହାଁତଲେ ହୀଙ୍କ, ହାଅ ନା ଜୀଞ୍ଜୁ ଜିକେଏ ହୀଙ୍କ, ନାନୁ ମିଙ୍ଗେ ହାରେକା ଜୀଞ୍ଜୁନହଁ ମାଞ୍ଜାତିହଁ ଏନାଆଁ ମୀରୁ ନାଞ୍ଜେ ଉଶା ଜୀଞ୍ଜୁନହଁ ମାଞ୍ଜାଦେରି ?

୧୬ ସାମା ନାନୁ ଜାହାରାଙ୍କ ମିଙ୍ଗେ ବଦୁ କିୟାଆତେଏଁ, ସାମା ମୀ ବିତ୍ରାଟି ଆମ୍ବାଆରି ଏଲେଇଞ୍ଜାନେରି ନା ସୁତରି ମାନାକି ମିଙ୍ଗେ ମିତି ତଲେ ଆସ୍ତାତେଏଁ □

୧୭ ନାନୁ ମୀ ତାଶା ଆମ୍ବାଆରାଙ୍କ ପାଶ୍ତାମାଞ୍ଜାଙ୍କ, ଏଞ୍ଜାରି ବିତ୍ରାଟି ରଅଣି ତଲେ ମୀ ତାଶାଟି ଏନି ଲାବା ବେଟାଆତେଏଁ କି ?

୧୮ ନାନୁ ତିତସଙ୍କ ହାଜାଲି ବାଡ଼ିମାଲ୍ଲା ମାତେଏଁ, ଇଞ୍ଜା ଏଞ୍ଜାଣିତଲେ ଅର ତାୟିଙ୍କ ମୀ ତାଶା ପାଶ୍ତାତେଏଁ □ ତିତସ ମୀ ତାଶାଟି ଏନାଆଁ ଲାବା କିତେସି ? ମାମ୍ବୁକି ରଣ୍ଡିଏ ଜୀଞ୍ଜୁତଲେ ତାକିହିଲଅମି ? ମାମ୍ବୁ ଏନାଆଁ ରଣ୍ଡିଏ ପାଞ୍ଚଲିତା ତାକିହିଲଅମି ?

୧୯ ନୀର୍ଘ ପାତେକା ମୀରୁ ଅଶ୍ଵିମାଞ୍ଜେରି, ମାନ୍ସୁମୀ ନକିତା ଜାହାରାଇଁ ନେହଁ କିହିମାନମି ? ମାହାପୁରୁ ନକିତା କ୍ରୀସ୍ତତି ସେବା କିନାତମି ଲେହେଁ ମାନ୍ସୁ କ୍ରୀତା ଜଲିମାନମି, ଇଞ୍ଜା ଏ ଜୀସ୍ତୁତି ତାୟିୟାଁ ବାରେ କାତା ମୀ ନେହେଁତାକି ଖେସିମାନମି □

୨୦ ଇଚିହଁ ଏଚେତା ନାନୁ ମୀ ତାଶା ଖାଡ଼ିସାରେ, ମିଙ୍ଗେ ଏନିକଁ ମେସାଲି ମନ କିହିମାଇଁ ଏଲେକିହଁ ମିଙ୍ଗେ ମେସ୍ତାଆସାରେ, ଅଡ଼େ ମୀରୁ ନାଙ୍ଗେ ଏନିକଁ ମେସାଲି ମନ କିହାଁ ହିଲଅତେରି ଏଲେକଁ ମେସ୍ତାଦେରି, ଏଦାଆଁତାକି ନାନୁ ଆଜିମାଇଁ; ଇଚିହଁ ମା ବିତ୍ରା ବାଡ଼ିବାଦା, ତାହାରା, କପା ଅଡ଼େ ଗଚି ଗଚି ଆନାୟି, ରଅସି ରଆଶାଇଁ ନିନ୍ଦା କିନାୟି, ସାକ୍ତି କାତା ଜଲିନାୟି, ବଡ଼ପଣ ତସ୍ଵି ଆହାଁ ଗଡ଼ହା ଆନେ;

୨୧ ଇଞ୍ଜା ନାନୁ ଅଡ଼େ ଖେଶ୍ଵେ ଖାଡ଼ିସାରେ ନା ମାହାପୁରୁ ମୀ ତାକି ନାଙ୍ଗେ ଅଡ଼େ ଲାଜା କିଞ୍ଜିକିୟାନେସି, ଇଞ୍ଜା ମୀ ବିତ୍ରା ତଲିଏ ପାପୁ କିହାମାନାରି ତାମି ଲାଗେଏତି କାମା, ଦାରିକାମା ଅଡ଼େ ଦାରି କାମାତାକି ଜୁପକା ଆନାଣି ତାକି ନୀର୍ଘ ପାତେକା ମନ ଖେଡ଼ହା ହିଲଅରି ଏଞ୍ଜାରି ତାକି ନାନୁ ଦୁକୁଆହଁ ଡ଼ାହାଲିଆନେ □

୧୩

ଜାଗ୍ରାତା କିହାଁ ଜହରା ତଲେ ଆକୁତି ରାପ୍ନାୟି

୧ ନୀର୍ଘ ତଲେ ତାନି ପାଲି ନାନୁ ମୀ ତାଶା ଖାହିମାଇଁ, ଦାର୍ମପତିତା ରାସ୍ଵକି ଆହାମାନେ, “ଆମିନି ଦହଡ଼ି କାତା ନୀହାଁୟି କିନାୟି ରିଆରି କି ତାନି ଜାଶା ସାକିୟାଁ ତଲେ ତାରି କିଞ୍ଜିଆନେ”

୨ ଆମ୍ବାଆରି ନଚେଏ ପାପୁ କିହାମାଚେରି ଏଞ୍ଜାରାଇଁ ଇଞ୍ଜା ବାରେତି ଏନିକଁ ତଲି ରୀ ପାଲି ଖେସାମାଞ୍ଜାତେସଁ, ନୀର୍ଘ ହେକ ମାଞ୍ଜାନା ଏଲେକିହଁ ଏ ନଚେଏ ଖେସିମାଞ୍ଜାଇଁ, ନାନୁ ଅଡ଼େ ଖାଡ଼ିହଁ ଏଞ୍ଜାରାଇଁ ତଶ୍ଵ ହୀଆନା ପିହଅଁ □

୩ ଏନିକଁ କ୍ରୀସ୍ତ ନା ତାଶା ଜଲିମାଞ୍ଜାନେସି ମୀରୁ ଏଞ୍ଜାଣି ପାର୍ମାଶା ପାରିମାଞ୍ଜେରି; ଏଞ୍ଜାସି ମିଙ୍ଗେତାକି ବାଡ଼ୁୟୁ ହିଲାଆଗାଟାସି ଆଏ, ସାମା ମୀ ତାଶା ବାଡ଼ୁୟୁ ଗାଟାସି ଆନେସି,

୪ ଏଞ୍ଜାସି ବାଡ଼ୁୟୁ ହିଲାଆତାକି ପାସି ମୁଣ୍ଡାତା ଏପକି ଆଡେସି, ଆଡ଼ିଜିକେଏ ମାହାପୁରୁ ବାଡ଼ୁୟୁଟି ଏଞ୍ଜାସି ନୀତାମାନେସି □ ମାମ୍ବୁ ଜିକେଏ ଏଲେକ୍ ତାନି ତାଣା ବାଡ଼ୁୟୁ ହିଲାଆ ଗାଟାତମି, ସାମା ମାହାପୁରୁଟି ବାଡ଼ୁୟୁ ତାକି ମାମ୍ବୁ ମୁମି ତାଣା ଏଞ୍ଜାଣିତଲେ ନୀତାମାନମି □

୫ ମୀରୁ ନାମୁତଲେ ମାଞ୍ଜେରିକି ଆଏ, ଏ କାତାତା ଜାହା ଜାହାରାଇ ତାୟିପାରି କିହାକତାତୁ ଇଞ୍ଜା ଅଣ୍ପାଦୁ, କି ଜୀସୁ କ୍ରୀସୁ ମୀ ତାଣା ମାନେସି, ଇଦାଆଁ କି ମୀରୁ ଜାହା ଜାହାରା କାତାତା ପୁଞ୍ଜାହିଲଅତେରି ? ଏଲେଆହ୍ ଆଡ଼ିହ୍ ମୀରୁ ତାୟିପାରି କିନି ତାଣା ଜୀଣା ଆହା ହିଲଅତେରି □

୬ ସାମା ନାନୁ ବାସୁ ଇଟାମାଇଁ, ମାର ତାୟିପାରି କିଞ୍ଜିଆହା ଜୀଣା ଆହାମାନାୟି, ଇଦାଆଁ ମୀରୁ ପୁଞ୍ଜେରି □

୭ ମୀରୁ ଏନିକ୍ ଏନି ଲାଗେଏଡି କାମା କିଅତେରି, ଇଦାଆଁତାକି ମାହାପୁରୁ ତାଣା ମାମ୍ବୁ ପ୍ରାତାନା କିହିମାନମି; ମାମ୍ବୁ ଏନିକ୍ ତାୟିପାରି କିଞ୍ଜି ଆହାଁ ଜୀଣା ଆହାମାନି ଲେହେଁ ତଞ୍ଜାଆନମି, ଇଦାଆଁତାକି ପ୍ରାତାନା କିହିଲଅମି, ସାମା ମାମ୍ବୁ ତାୟିପାରି କିଞ୍ଜି ଆହାଁ ଜୀଣା ଆଆଡିଲେହେଁ ତଞ୍ଜା ଆଆଡି ଜିକେଏ ଏନିକ୍ ମୀରୁ ନେହ୍ କାମା କିଦେରି, ଇଦାଆଁତାକି ପ୍ରାତାନା କିହିମାନମି □

୮ ଇଡିହ୍ ମାମ୍ବୁ ସାତା କପାଟି ଏନାଆଁ କିହାଲି ଆଡ଼ିହିଲଅମି, ସାମା ସାତା ଖାକିଟି ଦେହେଁ ବାରେ କିହାଲି ଆଡ଼ିନମି □

୯ ଏଡିବେଲା ମାମ୍ବୁ ବାଡ଼ୁୟୁ ହିଲାଆ ଗାଟାତମି ଆନମି ସାମା ମୀରୁ ବାଡ଼ୁୟୁ ଗାଟାତେରି ଆଦେରି, ଏଡେତା ମାଙ୍ଗେ ରାହାଁ ହଡ଼ାନେ; ମୀରୁ ଏନିକ୍ ବାରେ ଖାକିଟି ନେହାଁତେରି ଆଦେରି ଏଦାଆଁତାକି ଜିକେଏ ପ୍ରାତାନା କିହିମାନମି □

୧୦ ଏଦାଆଁତାକି ମୀ ତାଣାଟି ହେକ ମାଞ୍ଜାନା ନାନୁ ଇ ବାରେ ରାଡ଼ିମାଞ୍ଜାଇଁ, ଏନିକ୍ ମୀ ତାଣା ଖାହାନା ପ୍ରୁ ନାଙ୍ଗେ ମେକ୍ ହାଲି ହୀଆନା, ପାଡିକିହାଲି ହୀହାମାଞ୍ଜାନେସି, ଏ ଅଦିକାରା ଲେହେଁ ମୀ କପାଟି ନିଙ୍ଗାନା ବାଡ଼ୁୟୁ ତସାଲି ମିଙ୍ଗେ ଲଡ଼ା ଆଏ □

୧୧ ତାୟିୟାଁ ଅଡେ ତାଙ୍ଗିସ୍ତାତେରି, ରାହାଁ କିଦୁ, ନେହାଁତେରି ଆଦୁ, ରଅତେରି ରଅଣାଇଁ ବାସୁ ହାଞ୍ଜିଆଦୁ, ରଣିଏ ମନ ଆଦୁ, ହିଡ଼ଡ଼ି

ତଳେ ବାସା ଆଦୁ, ଅଡ଼େ ହିଡ଼ି ଇଞ୍ଜା ଜୀଝୁ ନନ୍ତି ମାହାପୁରୁ ମୀ
ତଳେ ଡ଼ିନେସି □

^{୧୨} କ୍ରୀସ୍ତାନା ତାୟିୟାଁ ଲେହେଁ ସୁଦୁଜୀଝୁ ନଝୁ ତଳେ ଜୀଝୁ
ନଝିଆହାନା ମୀରୁ ମୀରୁଏ ରଅତେରି ରଅଶାଈଁ ନଶ୍ତାନା ଜହରା
କିଝିଆଦୁ □

^{୧୩} ଇମ୍ପାଆଁ ମାନି ମାହାପୁରୁ ଲକୁ ମିଞ୍ଚେ ଜହରା ଝେସିମାଞ୍ଜାନେରି
□

^{୧୪} ପ୍ରୁ ଜୀସୁ କ୍ରୀସ୍ତତି କାର୍ମାମେହ୍ନାୟି ମାହାପୁରୁତି ଜୀଝୁନନ୍ଦାୟି
ଅଡ଼େ ସୁଦୁଜୀଝୁ ତଳେ ଆଣ୍ଡିନାୟି ମୀ ବାରେତାକି ଆୟାପେ □

ପୁସ୍ତକ ଶିକ୍ଷା

The New Testament the Kusaal language (Ghana)

copyright © 1996 Wycliffe Bible Translators, Inc.

Language: Kusaal (Kuvi)

Contributor: Wycliffe Bible Translators, Inc.

ପୁସ୍ତକ ଶିକ୍ଷା,

କୁସାଲ ପୁସ୍ତକ ଶିକ୍ଷା, 2020

The New Testament in Kuvi Language

The Word for the World International

All rights reserved.

2025-05-08

PDF generated using Haiola and XeLaTeX on 8 May 2025 from source files

dated 8 May 2025

c688c8bf-38ac-5c00-90bd-6e4eaa165a20